

靈峯滿益大師說

秘藏指南



青島湛山寺印經處印行

## 序

秘藏者何、法身般若解脫、三妙德也。妙德如圓伊三點、不縱不橫、念佛屬橫超、何言秘藏。不知橫超指法門言、不縱橫指諦理言、祇此不縱橫諦理、餘門由縱入。念佛一門、則橫超也。衆生一念心中、極樂依正、莫不圓具、是正因佛性。念念了達心外無佛、心外無土、是了因佛性。信願行資糧、是緣因佛性。由了因故、破見思惑、成般若德。由緣因故、破塵沙惑、成解脫德。由正因故、破無明惑、成法身德。正因、性也。緣了二因、修也。修卽性故、三因祇一心。因卽果故、三德亦祇一心。不縱不橫、是名圓。餘門學道憑自力、見思塵沙無明三惑、次第修斷。同居方便實報寂光四土、亦次第感生、所謂縱入也。是名漸圓。念佛往生仗佛力、未斷見思、卽能出娑婆、生同居淨土、旣生已、任運斷惑、任運證入方便淨、實報淨、寂光淨、所謂橫超也。是名頓圓。頓卽般若、圓卽解脫、圓頓不二、卽法身、是名不縱橫念佛秘藏。蓮生居士、檢靈峯宗論、摘其宏揚淨宗者、本堅密大師意、彙爲一冊、題曰秘藏指南。此秘藏中、不惟堅密靈峯、時時出現、且盡



攝未來衆生、以般若念心、修解脫淨業、證法身彌陀、同歸此秘藏、而更無有外也矣。  
道光丁未上元日項名達謹序

## 重刻秘藏指南序

自佛法入中國數百年、而禪教律乃燦然明備。其淨土一門、名爲橫出三界、大方便門、帶業能往、豈非深遠微妙卓絕之行也乎。竊謂佛法甚靈、一微塵含無邊法界、運我最靈之心、念此最靈之佛、心佛一際、何所不入乎。以淨土入宗、故誰字公案出、或不拈誰字、直以阿彌陀佛爲話頭、窮叅力究、至桶底脫、以淨土入律、老實念佛、莫換題目、以淨土入教、自他三觀、則台也。地地不離念佛、則賢也。以華嚴融念佛境界、則彭進士尺木之華嚴念佛三昧論等書是。以三觀標念佛境界、則蕩益大師秘藏指南等書是。此指南從十卷靈峯宗論中抽出別行、於念佛者最易啓發、能入此觀、而華嚴亦在是矣。佛無二法、無二但一圓融、便處處見總別同異成壞之一時炳現、蓮華剎海、涉入交叅、有心人其植根上上者乎。今妙然師等以大乘心、權實互用、募刻此卷、旣工竣、爰囑筆記其緣起。

同治八年仲冬月淨業比丘妙空敬序

### 重刻秘藏指南序

何謂秘藏耶、天然之性德也。何謂指南耶、無作之妙觀也。以我卽空卽假卽中之心念、念彼卽真卽俗卽中之佛名、能所不二、生佛體同、不離當念、秘藏頓開、念六字名、證無量壽、簡要直捷、至圓至頓、所謂不思議大法門也。蓋此法門、釋迦如來、金口宣說、十方諸佛、長舌勸讚、非九界自力之所能知。唯佛與佛、乃能究盡其旨。故世尊深歎其難信也。若仗

佛力。於此法門、生正信、發大願、改過遷善、常持佛名而不間斷、雖愚夫愚婦、亦決定往生。所謂夫婦之愚不肖、可以與知與能、法門之妙、孰過於此哉。靈峯大師、深悟圓宗、闡淨土法門、言言懇切、妙應時機、遵而行之、決生淨土。趙居士體

師婆心、輯其要旨、名曰秘藏指南。自兵亂後、其板淹沒。余仰體

佛慈、募資重刻、用廣流通、爲法門之一助、板成之日、誌其緣起云耳。時

同治八年仲冬吉日

淨業學人妙然敬序

秘藏指南卷上

淨業學人趙鉞敬編



願文

四十八願

天啓元年歲次辛酉七月三十日時名大朗優婆塞

稽首三身圓滿尊、一切真如覺性海、稱彼法界等虛空、種種莊嚴大願海、果因交徹、不思議、菩薩一切修行海、亦禮阿彌陀如來、觀音勢至及地藏、我爲慈親罔極恩、徧憫一切衆生界、發生如實增上心、修行念佛勝方便、深信淨土攝受門、廣大誓願普皆被、妙戒爲舟智慧舵、方便爲帆佛力風、盡未來際度衆生、終不一念捨五濁、諸佛願海如帝珠、攝於我願重重現、我願亦如摩尼王、諸佛願海悉皆攝、願輪橫徧於十方、亦復豎窮於三際、一切智智之所乘、故我至心勤修習。

第一願、我本發心、上報慈父鍾之鳳生恩、願三寶力、令我無始慈父、咸生淨土、速證菩提、令聞我名者、亦報父恩。第二願、我本發心、上報悲母金大蓮養育恩、願三寶

力、令我無始悲母、咸生淨土、速證菩提、令聞我名者、亦報母恩。第三願、度法界衆生成佛竟、方取泥洹。第四願、我媯機身心俱斷、斷性亦無、令聞我名者、永斷媯根。

第五願、我殺害業習、滅盡無餘、令聞我名、徧生慈力。第六願、我癡闇謗三寶業、滅盡無餘、令聞我名者、正信三寶。第七願、我諸不善業、悉得清淨、令聞我名者、安住梵行。第八願、我決生極樂世界、速證無上菩提、分身塵刹、盡未來際、度生無厭。

第九願、我生生不忘本願、於五濁世、善化衆生。第十願、我處處宏通正法、無諸魔障。十一願、得無量智慧、達一切佛法。十二願、得無量辯才、開迷降外、一切無畏、如師子吼。十三願、得無量神通、徧十方國、承事如來、及善知識、一切海會、無不得與。十四願、我能出種種妙音、盡未來際、讚歎三寶、令衆生知所歸依。十五願、隨意出生種種妙供、供養三寶、爲衆生作大福田。十六願、隨喜一切衆生、所有功德、令成無上菩提。十七願、十方如來、成正覺時、我先勸請、轉大法輪、開示衆生、無上覺路。十八願、十方如來、般涅槃時、我悉勸請、莫入涅槃、常住世間、饒益含識。

十九願、一切海會、推我爲大法王子、佛讚我功德智慧、慈悲願力、如觀世音、地藏王、等無有異。二十願、以大悲光照諸地獄、觸我光者、應時變諸苦事、悉成妙樂。二十一願、以大悲光照諸餓鬼、觸我光者、應時捨身、得淨土生。二十二願、以大悲光照諸畜生、蒙我光者、離諸怖畏、捨身之後、得淨土生。二十三願、以大悲光照諸鬼神、蒙我光者、悉捨瞋心、開悟佛道、捨諸醜陋、得清淨身。二十四願、以大悲光照諸苦惱衆生、蒙我光者、疾病消除、六根俱足、厄難恐怖、悉皆解脫、無病延年、發菩提意、若臨命終、卽生淨土。二十五願、以大悲光照有形無形、有想無想、及諸魔外、令其身心、捨諸邪見、通達佛乘。二十六願、以大悲光照觸人天、令不迷欲樂、及欣厭定、勤求無上菩提。二十七願、以大悲光照聲聞緣覺、令捨無爲、速趣佛乘。二十八願、以大悲聲、令一切衆生、決定明悟、不戀三界、不樂餘乘、唯求無上菩提。二十九願、以大悲神力、隨順衆生、種種所求、俾於我法、生深信心。三十願、以救度衆生故、於十方現作佛身、或淨土攝取、或穢土調伏、方便無量。三十一願、救度衆生故、隨



類現身。一一類中、種族尊勝、威德自在、令諸同類、敬愛受教、直至菩提。三十二願、以大悲方便、現於一切無佛法處、法滅處、佛法不能行處、隱顯大化、爲長夜燈、救拔沉冥、出於苦海。三十三願、恆於衆生、飢渴之時、現作飲食、疾疫現作藥草、寒作衣服、熱作涼風、險阻作津梁、一切所須、皆現作之、若服若食、若倚若履、咸得安樂、發菩提心。三十四願、樂求佛乘衆生、聞我名已、不捨肉身、得佛菩提。三十五願、莊嚴佛土菩薩、聞我名已、其國踰於極樂、欲現穢土、則得無量方便、善化剛強。三十六願、令欲見諸佛土聞法衆生、皆得見聞。三十七願、令欲往無數世界、供養三寶衆生、一念之間、普得周徧。三十八願、令欲生佛土衆生、聞我名號、卽得隨願往生。三十九願、令同我誓願衆生、速得無量智慧方便、威德自在。四十願、令樂小乘衆生、速登聖果、卽回心入菩薩乘。四十一願、十方修行菩薩、聞我名號、直至菩提、永無魔事。四十二願、十方魔外、聞我名號、卽捨邪見、同歸正覺。四十三願、以大悲心力、使五逆十惡、四棄八棄、當墮大獄衆生、知求哀懺悔、隨現勝妙色身、摩頂安慰。

令罪根永拔、發菩提心。四十四願、以平等大慈悲力、能滅謗我法、詈我名者、極重惡障、速趣菩提。四十五願、我慈眼最極清淨、普視盡虛空界、乃至極苦處、悉令安樂、極惡衆生、悉令賢善。四十六願、我印手最極莊嚴、於念念中、出一切供養雲、珍寶雲、衣服雲、衆具雲、飲食雲、醫藥雲、三昧雲、總持雲、辯才雲、光照雲、徧虛空界、盡未來際、利益衆生。四十七願、我名號盡十方界、靡不周徧、彼法滅處、我名不滅、恆令聞稱、悉得解脫。四十八願、我色身最極微妙、以不可說不可說佛刹極微塵數大人相、而自莊嚴。一一相、有不可說不可說佛刹極微塵數隨形好。一一好、有不可說不可說佛刹極微塵數光明。一一光、作不可說不可說佛刹極微塵數色、嚴飭國界。演不可說不可說佛刹極微塵數聲、宣揚妙法。出不可說不可說佛刹極微塵數香、華飲食衣服衆具、普供一切。現不可說不可說佛刹極微塵數化佛、教化一切。一一佛、有不可說不可說佛刹極微塵數諸化菩薩。一一菩薩、有不可說不可說佛刹極微塵數殊勝莊嚴。一一嚴、作不可說不可說佛刹極微塵數廣大佛事。一一事、於不

可說不可說佛刹極微塵數世界、利益衆生、有見一佛事、則得見我微妙色身。見我身者、則能與我平等、則能速得成佛。

結壇持往生咒偈

稽首無量壽、拔業障根本、觀世音勢至、海衆菩薩僧、我迷本智光、妄墮輪迴苦、曠劫不暫停、無救無歸趣、劣得此人身、仍遭劫濁亂、雖獲預僧倫、未入法流水、目擊法輪壞、欲挽力未能、良由無始世、不植勝善根、今以決定心、求生極樂土、乘我本誓船、廣度沈淪衆、是故於娑婆、畢定應捨離、猶如被溺人、先求疾到岸、乃以方便力、悉拯濕流人、我以至誠心、深心迴向心、然臂香三炷、結一七淨壇、專持往生咒、唯除食睡時、以此功德力、求決生安養、我若退初心、不向西方者、甯卽墮泥犁、令疾生改悔、誓不戀人天、及以無爲處、仰願大威神力、無畏不共、三寶無邊德、加被智旭等、折伏使不退、攝受令增長。

結壇念佛迴向文

稽首阿彌陀、諸佛護念法、淨土諸聖賢、唯垂哀護持。智旭無始來、迷常住理、失智慧明、背自性而枉受輪迴、取妄心而永違真境。善根雖發、投正教以捨家、宿習偏濃、熏三昧而罔就。矢心淨域、誓出苦輪、機感不專、聖應莫顯。悠悠歲月、罔罔襟期、可痛可悲、無洲無渚。今依釋迦誠訓、七日持名、用投無量慈光、一生求度、棲身淨壇、專稱洪號。若定若散、有記無記、仗佛悲輪、功無唐棄。願以功德、及諸善根、悉共衆生、回向安養。所冀現生魔障消除、捨報正念決定、一剎那頃、生如來前、受菩提記、滿本願輪。

### 禮淨土懺文

比丘智旭等、曠大劫來、至於今日、既迷本性、恆在輪迴。三業六根、無惡不造。五趣八難、無苦不嘗。暗識相傳、曾弗覺悟。死生浩漫、解脫何期。茲值大乘、得生微信。快聞淨土、宜速知歸。勤精進而已、憾其遲、更怠緩而擬將何及。爰發懇心、共期三昧、修往生之願儀、矢七日以無雜。六時行道、四威攝心。仰叩圓悲、必垂妙應。願深求正法、不染情塵。行與志齊、道追古聖。盡捨緣務、痛念無常。八風莫動、四誓莫移。乃至外護、行人、

並植深因、同歸淨土。師僧父母、歷劫親緣、法界靈蠢、過現有情、蒙法藏之願光、承阿彌之慈力、三障頓除、四土等淨。以此發願功德、總報三有四恩、同圓種智。

禮淨土懺文

敬禮能仁無量壽、二土法寶教行理、觀音勢至海衆僧、無邊三寶咸加護。菩薩沙彌智旭、與法界衆生、迷真起妄、背覺合塵、惑業無窮、苦果不息、無始至今、從未覺悟、雖逢出要、罔識進趣。由是往還六道、沒溺三途、廣造惡因、備嬰劇苦。今以夙時微善、獲遇真乘、無奈染習偏強、淨功莫尅、違出家初志、負佛祖深慈。扼腕論心、慚天愧地。爰立勝志、七日爲期、修行淨土懺儀、願成念佛三昧。六時行道、一意持名、叩佛圓悲、必成妙應。伏願分毫之善、等施含生、稱法性以無窮、乘願輪而自在。見聞隨喜、惡滅善生。契會寂光、同歸常樂。盡法界有情、無一不生極樂、而極樂不增。盡法界微塵、無一不現極樂、而極樂不減。徹悟無生、而熾然往生。了知不去、而確爾求去。大闡彌陀法化、廣破儻侗邪宗。深符釋迦願力、力挽支離淺學。度五濁於九品、淨四土於一心。虛

空可殞、我願不灰、願佛法僧、證明攝受。

### 大病中啓建淨社願文

甲午十二月十有三日、菩薩戒弟子智旭、一心歸命、極樂世界、阿彌陀佛、觀世音大勢至清淨海衆、及十方三世一切三寶。痛念智旭、本爲生死大事。二十四歲出家、絕無半點好爲人師之念。不意幻緣所逼、謬爲人師、二十餘年。雖有宏法微善、而虛名所累、觀行荒疎、弗能折伏煩惱、以登五品。今病患纏身、心雖明了、力不自由。痛哭號呼、罔知攸措。幸仗佛慈、殘喘未絕、設非急勸淨業、何以永脫苦輪。爰發虔心、敬就靈峯藏堂、邀同志法侶、人十及外護菩薩沙彌、人五和合一心、結社三載。每日三時課誦、稱禮洪名。二時止靜、研窮大藏、教觀雙修、戒乘俱急。願與法界衆生、同生極樂。智旭從今以去、誓不登座說法。除同志執經問義、不敢倦答。若敷文演義、自有照南靈晟性且、略可宣傳。誓不背佛平坐。除稍偏及對像坐。誓不登壇授戒。若授戒學律、自有照南等慈、可以教授。誓不應在家人請齋。除寺院靜室中、仰乞三寶、證明攝受。令智旭

諸緣未盡、早就輕安。大限難逃、徑歸安養。生則念佛兼著述、死則不墮亦不退。又願同行法侶、無論旭存與否、堅志同修、有始有卒。又願外護沙彌、無論旭存與否、誠心營事、勿懈勿失。以此殊勝淨因、回向無上極果、普與含生、咸歸秘藏。

### 法語

源示法念佛工夫、祇貴真實信心。第一要信、我是未成之佛、彌陀是已成之佛、其體無二。次信娑婆的是苦、安養的可歸、熾然欣厭。次信現前、一舉一動、皆可迴向西方。若不迴向、雖上品善、亦不往生。若知迴向、雖誤作惡行、速斷相續心、起殷重懺悔、懺悔之力、亦能往生。况持戒修福、種種勝業、豈不足莊嚴淨土。只爲信力不深、勝業淪於有漏。又欲捨此別商、誤之誤矣。但加真信、一切行履、更不須改也。

心示王法華一經、殷勤稱歎方便。須知有世間方便、布施愛語孝弟忠信等是也。有出世間方便、苦空無常無我不淨數息因緣遠離知足等法門是也。有出世上方便、十波羅密、四攝四辯、八萬四千三昧總持等是也。有不思議勝異方便、信自性中、實

有西方現成佛道之彌陀如來。唯心中實有莊嚴之極樂世界。深心宏願。決志求生。不唯上上方便。是其資糧。將世出世一切方便。無非往生左券。此法門中點鐵成金手段。不歷僧祇。頓階不退。名絕待妙法也。

示 精 香山參鳥窠。直告曰。諸惡莫作。衆善奉行。三歲兒說得。八十翁行不得。從上諸祖。指點出生死法。最簡易明白。正不必金剛圈栗棘蓬爲元妙也。馬祖初年。但云卽心卽佛。果知卽心卽佛。自然諸惡莫作。衆善奉行。果能諸惡莫作。衆善奉行。便知卽心卽佛。故知欲悟卽心卽佛。須是持戒念佛。戒持得淨。佛念得切。塵垢自除。光明自現。偈曰。持戒便是平心。念佛便是直行。參得箇點元機。不向鉢盂討柄。若更者也之乎。失卻佛祖性命。

善友 示 郭 佛法大海。信爲能入。智爲能度。若信心而乏智慧。未有不泣岐兩端者。佛言。末世鬪諍堅固。億億人學道。罕有一人證果。唯依念佛求生淨土。可以橫超苦輪。若深信念佛禮拜。是佛祖真因。確乎不被時流所轉。便是大智慧光明。超登淨土。永無泣



歧之患矣。

養宋

自性彌陀、唯心淨土、二語。世爭傳之、不知以何爲心性也。夫性非道理、無所不統。故十劫久成之導師、不在性外。心非緣影、無所不具。故十萬億刹之極樂、實在中。惟彌陀卽自性彌陀、所以不可不念。淨土卽唯心淨土、所以不可不生。上自文殊普賢、馬鳴龍樹、天親、下至蜻飛、蠕動羽族毛羣、唯此一事。此事第一要信得極、二要時時發願、三要念佛工夫不間。三事具、至愚亦生。三事缺一、雖聰明伶俐、亦不生也。其有謗此者、卽謗三世諸佛菩薩。毗盧頂上、翻爲阿鼻最下層矣。哀哉。

示陸

超生脫死、捨淨土一門、決無直截橫超方便。而生淨土、捨念佛一法、決無萬修萬去工夫。近世盲禪、妄謂彌陀不必念、淨土不必生、儻侗鶻突、墮塹落坑。何若老實念佛、導之以信、要之以願、徑登九品蓮臺、與觀音勢至、海衆爲眷屬。迴視空頭惡見、邪禪、博一時假祖師之虛名、墮萬劫拔舌犁耕之實苦、何啻雲泥也哉。莫論散心定心、只尅課程、終身不闕、日勤日切、淨土華蕊、晝夜增榮矣。

示淨聖  
優婆夷

極聰明人，反被聰明誤，所以不能念佛求生西方。而愚人女子，反肯心厭娑婆苦，深求出離。當知彼是真愚癡，此乃大智慧，好惡易分，莫自昧也。每見僮侷顛預，大言欺世之假善知識，遇著老實念佛的樵夫農婦，亦教參禪，推來拽去，自供撫掌。此輩老實人，認作誠實，破壞善根，究竟參又參不來，念又念不熟，脚跟不穩，心事徊徨，噫，亦可慘矣。吾勸汝咬釘嚼鐵，信得西方及，切切發願，持戒修福，以資助之。無禪有淨土，萬修萬人去，但得見彌陀，何愁不開悟。此千古定案，汝不須疑。彼無恥邪師，敢誣先聖，輒肆翻案，祇益露其惡見耳。何嘗翻得古人定案哉。

示方  
爾階

念佛法門，雖該羅八教，圓收無量百千三昧，而下手之方，又最直捷痛快。蓋凡念相好，念法門，念實相等。固先開真解，然後下手，萬無夾帶疑情之理。只今持名一法，亦止驀直持去，不用三心兩意，深信淨土可生，發願決定往生，以持名爲正行，以六度等爲助行，萬修萬人去，斷斷可保任者，智者不可不決定其所趨也。

示劉  
今度

上品三種人等，首云慈心不殺，具諸戒行。蓋戒爲萬行總都，而慈心不殺，又爲

戒行先務。以此圓發三心、何土不淨哉。三心者、直心正念真如、名至誠心、顯法身德。樂集一切功德、名深心、顯般若德。宏誓無盡、名迴向發願心、顯解脫德。戒亦有三、攝律儀戒、無惡不斷、即成法身。攝善法戒、無善不滿、即成般若。饒益有情戒、無生不度、即成解脫。慈亦有三、生緣慈、不殺生、緣觀一切衆生、皆是我父母兄弟六親眷屬也。法緣慈、不殺法、緣觀一切地水、是我先身、一切火風、是我本體也。無緣慈、不著我、緣觀現前一念佛性、無所不徧、十方三世、有情無情、同一覺體、無二無別也。念念修此三慈、即淨三聚、三聚戒淨、三心即具、上品上生無疑矣。又觀行三心、能生上品凡聖同居淨土。相似三心、生上品方便有餘淨土。分證三心、生上品實報莊嚴淨土。究竟三心、生上品寂光淨土。永嘉誰無念、誰無生、若實無生無不生。金剛經應無所住而生其心。一切聖賢、皆以爲無爲法而有差別、此之謂也。

著元佛知佛見、無他、衆生現前一念心性而已。現前一念心性、本不在內外中間、非三世所攝、非四句可得、只不肯諦審諦觀、妄認六塵緣影爲自心相、便成衆生知見。

若仔細觀此衆生知見，仍不在內外中間諸處，不屬三世，不墮四句，則衆生知見，當體原卽佛知佛見矣。倘不能直下信入，亦不必別起疑情，更不必錯下承當，只深心持戒念佛，果持得清淨，念得親切，自然驀地信去，所謂更以異方便，助顯第一義也。此棒打石人頭，曝曝論實事，若要之乎者也，有諸方狐涎在，非吾所知也。偈曰：衆生知見佛知見，如水結冰冰還泮，戒力春風佛日暉，黃河坼聲震兩岸，切莫癡狂往外求，悟徹依然擔板漢。

示石友

念佛求生淨土，乃一門圓攝百千法門，非舉一廢百也。但必一門深入，念佛爲正行，餘一切戒定慧等爲助，正助合行，如順風之舟，更加板索，疾到岸矣。念佛之法雖多，持名最爲簡便。持名之法雖多，記數尤爲穩當。真操實履之士，豈求異愚夫愚婦哉。

西示明

出三界火宅，有橫豎兩途。以自力斷惑超生死者，名豎出三界，事難功漸。以佛力接引生西方者，名橫超三界，事易功頓。遠祖云：功高易進，念佛爲先。經云：末世億

億人修行、罕一成道、惟依念佛、可得度脫、如趁船渡海、不勞功力。夫能篤信西方捷徑、至誠發願、一心念佛、求生者、真大丈夫矣。儻信不真、願不切、行不力、佛雖大慈爲舟、如衆生不肯登舟、何哉。

在示之謝吾人現前一念心性、過去無始、未來無終、現在無際、覓之了不可得、而不可謂無。應用千變萬化、而不可謂有。三世諸佛、一切衆生、從無二體。十方虛空、剎塵差別、皆吾心所現之相分耳。是故四種淨土、皆不在心外、乃名唯心。謂極樂不卽唯心、則西方豈在心外、而吾心豈局東方者哉。人謂諸有爲法、皆如夢幻。不知心性、不可喚作有爲、不可喚作無爲、因迷故、卽無爲成有爲。有三界輪迴因果、喻如夢幻泡影露電、若返迷歸悟、則又卽有爲成無爲。如夢得醒、幻復本、泡歸水、影歸質、露不異溼性、電不異常光。今念佛求生淨土、正返迷歸悟、至圓至頓、概以夢幻掃之、可乎哉。夫依對待而論、娑婆活計、添夢者也。求生淨土、醒夢者也。不可不求生也。依絕待而論、惑業感於三界、惡夢也。念佛生於淨土、好夢也。亦不可不求生也。苟深思此理、淨土之

生萬牛莫挽矣。天如大祖師云、悟後不願往生、敢保老兄未悟、釋迦復起、不易斯言。  
示蔡 天地萬物、皆有始終、有形象、有方隅、有分劑。唯心識無始終形象方隅分劑。故  
曰、覓心了不可得、心了不可得、而天地萬物、無一不唯心矣。然我法二執不破、則唯  
心唯識之理不彰。心識之理未明、則因果感應之妙、不能如指諸掌。故華嚴云、應觀  
法界性、一切唯心造。觀經云、深信因果、不謗大乘。夫心猶金也。十法界因果、猶種種  
莊嚴器具也。然天下容有不造器之頑金、斷無不造十法界之頑心。縱一念不生、仍  
造成無想外道矣。故大智慧人、深悟唯心、必勤念佛。所謂是心作佛、是心是佛、此唯  
二白居士、可承當之。

心證 證心大德、問心要於予。予曰、心要莫若念佛。壽昌云、念佛心卽是佛。蓋現前一  
念之心、無性緣生、緣生無性者也。惟其無性緣生、故念名滿腔是名、念利滿腔是利、  
乃至晝所爲、夜所夢、無不趨歸於一念之專注、而十界昇沈、從此出矣。惟其緣生無  
性、故熾然造集善惡之時、驀地放下、則一切法了不可得。然向此了不可得處坐定、

則墜無爲深坑、不能證法界無障礙體、不能起法界無障礙用、故須念佛求生淨土、方是大乘不可思議圓頓法門。夫念佛者、豈有他哉。以此緣生無性之一念、念彼無性緣生之佛名耳。佛名既是無性緣生、則緣生亦仍無性。是故念一聲、有一聲佛名顯現、念十百千萬聲、有十百千萬聲佛名顯現、而不念時、便寂然矣。念性既是緣生無性、則無性不礙緣生。儻不念佛、正恐又生種種雜念、縱不生雜念、亦恐墮在無生窠臼。故必以佛號生我之念、使我念念不離佛號、此乃心外無佛、佛外無心、是心作佛、是心是佛、謂之以佛證心可也。謂之以心證佛可也。謂之以佛證佛、以心證心、亦可也。至直捷穩當、至圓頓了義、不可思議、不可將餘一切法門比量。果如此信得及、直下念去、則諸佛出廣長舌相以證之。若人專念彌陀佛、號曰無上深妙禪。至心想像見佛時、卽是不生不滅法。金口誠言、可不信哉。

佛示念 吾人從無始來、直至盡未來際、決無不起念時。縱心慮灰凝、入無想定、仍墮八萬四千枯槁亂想。但念地獄則地獄界人、念餓鬼則餓鬼界人、乃至念佛則爲佛界

人耳。此理至明。故宗鏡云、一念相應一念佛、念念相應念念佛也。若更問念佛是誰、頭上安頭、騎驢覓驢、明眼爲之噴飯。而近代無知狂悖之徒、反以話頭爲奇特、名號爲尋常、棄如意珠王、競取瓦礫、可哀矣。晟溪諸善友、獨能結社念佛、盡一日中、出聲一炷香、默持一炷香、循環無間、必以一心不亂爲期。此簡巧之行、須深信勿疑、久久勿替、自當圓超五濁、圓淨四土、更莫向含元殿裏問長安也。

周  
示  
疑  
閱

信願如日、衆行如足、信願如牛、衆行如車、信願如棋之有眼、衆行如棋之有子、故信願行三、雖缺一不可、而尤以信願爲主爲導也。蓋信願既專、凡種種諸善、皆淨土資糧。縱萬不幸、誤作諸惡、誠心懺悔、斷相續心、亦足爲往生妙行。苟無信願、則戒感人天、定感色無色界、慧尅二乘權果而已。

### 答問

答卓左車彌陀疏鈔三十二問

原問附

問、華嚴雖二乘盲聾、亦兼攝聲聞、以含無量乘故。此經雖二乘種不生、乃道品大



小互通、正與華嚴四聖諦品不異。故有生彼經劫、方證小果者、大智度論云、彌陀亦以三乘度生、自應三藏五教總攝、何云不攝小乘、且既通雜華、復不能通雜華所攝無量乘耶。

答、疏主判經、以頓通圓、不以圓攝頓、又約道品、卽小成大、小果暫有終無之義、謂不互攝。豈一句彌陀、不橫羅諸教、圓契五宗、不全體華嚴、全攝諸乘耶。

問、餘門豎出、念佛橫出、餘門正指教中觀行、故禪稱別傳、淨云徑路、皆以超越觀行故。今云觀卽是念、念卽是觀、直以台觀當之、不反鈍置念佛耶。

答、此之橫豎、約自力他力、斷惑帶業而論、不約境諦觀智。故念佛圓收圓超一切法門、亦不可以參禪爲例。若論諦智四教觀行、有析空體空、次第一心之不同。謂前三豎出三界則可、謂非橫非豎之一心三觀、亦爲豎出可乎。况觀經以如來勝異方便、攝衆生性具觀門、同宗一心、同歸淨土、觀念相卽、何名鈍置。但辨持名、不唯散善、非妙觀、便不捷徑也。別傳之旨、尤不容乘言滯句。末法之中、有名無義、果令四教不收、

便成離經魔說、烏在其爲超越也。

問、天台三觀、得攝法界觀否。

答、華嚴法界、生佛同源、以收機不盡、不免現權隱實。則阿含乃至涅槃、皆華嚴闡外、所以驅率土盡令臣服也。法華實相、本迹同印、以說時未至、不免爲實施權、則般若乃至華嚴、皆法華前矛、所以會旬荒同令執玉也。一名從本垂末、一名攝末歸本、非一心三觀、何得事事無礙、非事事無礙、何名一心三觀。

問、合論判極樂淨土是權、淨名唯心淨土是實。然菩薩成佛、衆生來生、明言攝受往生之事、與彌陀無二、疏言此指事一心者、豈事一心、便不名唯心耶。

答、合論以不斷惑生同居、乃如來權巧之力、非謂四十八願、莊嚴淨土、亦非實也。淨名心淨土淨、正同法藏往因、至於菩薩成佛、衆生來生、何妨從實垂權。若念佛人、因事入理、又何妨卽權卽實。權實事理、總屬一心、雖分不分、古人判釋、皆當作如是觀。問、觀雖十六、言佛便周、何故鈔只通普觀爲助因耶。

答、念佛觀佛、歸趣同、入門異、初心行人、雜則不成三昧、故唯稱萬德洪名、便爲多善根。然正助兼修、本無定法、如行舟然、揚帆扯纜、撐篙搖櫓、各隨其便可也。

問、大本言生彼國者、皆當一生遂補佛處、然中下胎生、豈等覺菩薩耶。

答、非等覺而可稱一生補處、以不更歷生死、必圓無上菩提故。小本衆生生者、皆是阿鞞跋致、亦指此生必補佛處而言、不以常途三不退論。下又云、其中多有一生補處、則別指現證等覺者、亦以此生必補、故得云其中多有也。所以極樂凡聖同居土、與常途教意迥別、常途不過暫時同居、此與一切等覺、同淨寂光。故云得與如是諸上善人俱會一處、諸上二字、不概指無量聲聞菩薩、單指多有一生補處而言。又常途約感應、及聖者過去有漏業、得與權實聖人同居。此則同一無漏不思議業、感生俱會一處。故又云、不可以少善根福德因緣、得生彼國。少字揀至別教地前、并豎揀至圓教住前、皆仗自力登住、入同生性、方蒙諸佛護念。故吾每謂淨土大教、圓收一切教、超出一切教、正謂此也。

問、單念佛人、不修餘行、得波羅密、卽是多善多福。今念佛所證、止素法身耶。已俱萬行莊嚴耶。

答、三身一體、普賢行門、不外毗盧性海。是以初心雖不修餘行、令三昧易成、而三昧既成、三因圓顯。豈有已證法身、莊嚴終缺、亦何須未證法身、預恐不具足耶。然或一門深入、或餘行助成、未許執一、一行三昧、一卽是多、萬善同歸、多卽是一。

問、念佛的是誰、與別則公案無二。鈔云、體究念佛、與舉話頭、下疑情、意極相似。然四種念佛、未列體究一法。經文本無此意、不應入淨業門。今兩路雙徵。若參此不悟、亦不失往生。此爲參門留一退步、正墮偷心。若此疑不破、便不得生。此爲念門啓一疑情、卻成異說。智徹慈炤天奇毒峯諸師、皆主此說、何所本耶。雲栖諸祖諸師、何不直拈誰字。若祇相似而已、願聞不全是處。

答、因念佛人、不見佛性、偷心不死、故以此語昭告之。令直下相應、卽於一念中、圓見三身、圓淨四土、階理一心、此一門深入、一心不亂之前矛也。後人聞此誠言、無論悟

與不悟、便可死心念佛、更何用參此段公案、直須如此了得。當知昔人下此語時、絕無禪淨之分。後祖收之、但入本宗、非入淨業。何以故、公案現在故。今疏主收入淨業、仍爲禪宗。何以故、救有禪無淨土之病故。然則若信得及、以悟爲則、以淨土爲歸、真實不欺、不留退步、卽此似處、卽已全是。若信不及、死我偷心、而偷心轉甚、正好實念、而念反狐疑、只此似處、卽全不是。故曰學道須是鐵漢、著手心頭便判、有疑則參、雖罷參而不能無疑、則念欲起疑而何自。如是、則直念苦參、亦無非往生正行也。

問、如子憶母、心想儀容。今但念聲相續、不取相貌、易馳散否、或依出入諸息、得非小乘法耶。

答、子之憶母、或善想儀容、或呼號泣血。觀經云、彼人苦逼、不遑念佛。此指善友教言、汝若不能念彼佛者、應稱無量壽佛。此指夫三界無非劇苦、何止臨命終時、以畏苦心、呼號求救、馳散何從。否則攝心調息諸法、亦自不惡。圓人受法、無法不圓、豈有定屬小乘者耶。試問記珠定香、鳴魚擊磬等、大乘耶。小乘耶。

問、大本有一念定生彼國、疏中不及、豈以此經七日入定乃生、故揀去刹那生滅之一念耶。若釋一以義不以數、大本不應繫十念後。若止如經文、作一念喜愛、何不動如來佛刹、不以愛戀得生。

答、按寶王論、利根之士、元只一念往生。鈍根之人、臨終十念脫苦。一念者、一心不亂之一念也。當知十念七日、十日七七、九十日等、究竟亦惟一念。此一念、斷非刹那生滅之散心、亦不必四禪四空之禪定。故云、一念喜愛。阿閼經、喜戀心、本指欲染。

問、七日後、若永不復亂、不應只名七日。若更亂者、已經退轉、何能感佛。

答、前此若無真實意樂、則七日決不能一心不亂。後此若無真實受用、又安見七日功成耶。

問、鈔謂理一心爲觀力成就、則體究全屬觀門、然前言妙觀難成、故顯持名殊勝、今又通觀法、不仍觀勝持耶。若參誰字是體究、又全屬宗門、正參話時、不應有如智不二寂照難思等、理路可傍。

答、事理二途、混不得、分不開。疏主一往以稱名爲事持、體究爲理持、仍云機亦互通、不必疑阻。謂不假方便、自得心開、事持能成就理一心也。又謂體究之極、於自本心、忽然契合、名理一心。則未契時、體究無間、止名究理、正是事功。然體究一門、與近時禪宗相合、實與台宗妙觀不同。台觀必圓解了了、全性起修、隨舉一觀、無非不思議境。體究以未明心性、鞫其根源、契合之後、達如智不動、寂照一心、方與台宗圓解、合、非正參話時、有理路可傍也。初學妙理、既未精通、不可彷彿相傍、心粗境細、妙觀難成以此。

問、疏鈔大意、全重理持、則所明持法、最爲要害。今既持名、復云理觀、既是理觀、復拈話頭、禪淨止觀、三法混淆。行人念不歸一、將何爲宗。與一門深入、專修無間之旨、何復不侔。

答、疏主欲卽事入理、非以理奪事。當知持名是正行、理觀是所通、話頭是持名轉局也。序云、著事而念能相繼、不虛入品之功。執理而心實未明、反受落空之禍。亦未專

重理持。所以處處明理者、恐狂罔謗爲凡庸之行耳。後裔無知、反執理輕事、以遭落空之記、哀哉。

問、疏言一心、卽達摩直指之禪。又云、六祖斥無、乃門庭施設不同。假使纔宏直指、復讚西方、則直指之意、終無由明。旣言卽是直指、復言爲門不同、是少林曹溪亦不同耶。

答、心地法門、包含無際、總不外一心。門庭施設不同、一心旨歸不異。今一心卽直指之禪、言其指歸也。六祖斥無、是老婆罵婢子、只圖切齒耳。非謂但是宗門、便須撥淨土也。永明云、有禪有淨土、猶如戴角虎。中峯云、禪者淨土之禪、淨土者禪之淨土。豈讚西方、直指便不明耶。若言六祖定作是語、莫謗六祖好。

問、疏指至心念佛一聲、滅八十億劫生死重罪、屬理一心。又釋佛名經、一聞佛名、滅無量劫生死之罪。云一聞、不待憶念、無量、不但八十億劫、則何獨理一心也。又此經聞經聞名、皆得不退、事耶。理耶。



答、觀經十念、除罪往生、由怖苦心切、善友緣強、一念猛利、過百年悠悠、非必有究理之行、然勝於尋常事持、疏主或借顯事功極者、卽不違理乎。若佛名經所言、以彼佛具無量威德願力、故聞者獲如是益、聞不信、亦獲無量福。要非少善根福德衆生、所能得聞也。不退亦不一等、隨聞證者、有位行念三不退、僅歷耳根者、如食少金剛、究竟不消、爲遠因、終不退也。

問、棗柏言華嚴一乘大道、非往生菩薩境界。何故華嚴長子、十願導歸極樂耶。生公說、闡提有佛性、則後出涅槃爲證。今後出行願、全與棗柏不符、宗旨今將安歸。答、淨土豎該橫徧、寂光唯佛土、實報乃法身大士所居、方便攝三乘權位、同居則凡夫皆與。合論指大心凡夫、回心羅漢、出五濁、生同居方便二淨土。未悟毗盧性海、入因陀羅網法界也。普賢十願、導歸極樂、正不思議解脫境界。徹果徹因、通凡通聖。聖全法界入一塵、凡從一塵通法界。棗柏但言一乘大道、非往生菩薩境界、不謂往生菩薩、非一乘大道法門也。若云華藏大、極樂小、大小之見未忘、未夢華嚴法界在。

問、既以事持屬定、理持屬慧、而云事持未能破妄、利根徑就理持、將事不顯理、慧不由定耶。

答、三無漏學、後必具前、故理一心、或從體究、忽然契合、或從念佛、自得心開、皆由定來、今重悟理、不止除散。雖體究無間時、便可名事一心、亦有定力、而仍屬慧門、實則定慧二門、各有利鈍、疏略未言耳。

問、決志求驗、正在平時、經胡祇言臨終佛現。

答、行人見佛、隨淨業淺深、經明往生、故言接引耳。今只在執持名號處、努力加鞭、無論見與未見、但得信願行成就、往生自可無疑、慎勿生僥倖退息心也。

問、心不顛倒、故能預知時至、乃云死時何苦欲先知、何耶。

答、不貴預知、正欲令其心不顛倒、頗有因欲先知、而愈重其顛倒者。

問、大本十念、不言臨終、此與觀經、爲同爲別。

答、大本云、志心信樂、乃至十念、觀至心信樂、何等深切、不必在臨終時、實與臨終、同

一猛利。後世祖師、因立晨朝十念行門、畢生不缺、亦決往生。

問、文殊亦發願往生、何反揀去勢至。鈔言、耳根不念佛、念佛能攝耳根、又何耶。

答、法無優劣、機有抑揚、無煩戲論。觀音六根中、從耳根入。勢至七大中、從根大入。論入門、耳根此方獨利。論收機、淨念三根普通。又圓人法法貫徹、耳根淨念、互攝互融。初機耳唯一根、念乃都攝、亦可抑揚。

問、用攀緣心爲自性、如煮沙成饌。今念佛心、是攀緣耶。非攀緣耶。若是、則一切覺觀思惟、皆生死根本。若非、又何言念性生滅、因果殊感耶。若生滅卽不生滅、何云煮沙。此與波水之喻、當自不倫。波卽是水、沙非是饌。然法華若人散亂心、南能不斷百思想者、又非卽用此生滅心耶。

答、錯不在用攀緣心、在以之爲自性。所謂認驢鞍橋作阿爺下頷、便成沙饌之喻。若識得攀緣心、本無自性、則能用攀緣、不被攀緣用。所謂家賊難防時、識得不爲怨、便合波水之喻。况勢至一門、本屬根大、意根爲主、五根從之。故曰都攝六根、淨念相繼。

意根卽第七識。七識無始來、念念執我。今以妙觀察智力、令直下念佛、甜瓜換苦瓠、非尋常攀緣心比。尋常眼識緣色、乃至意識緣法、皆順生死法。念佛時、佛非色、非非色、乃至非法、非非法。超世間法、離語言道、但可淨念憶持、原非情量所行境界、豈念佛心是攀緣耶。且以攀緣六塵、增長生死者、轉而攀緣慈父、永脫輪迴、亦自不惡、安得一概論耶。又娑婆根性、唯耳根易顯圓常。念性猶屬生滅、非已悟如來藏性者、終不達念性本圓通也。末世學人、鮮登圓解、耳根入道、亦甚難言。倘不能向佛頂前四卷、痛思深義、窮源澈底、則初於聞中、入流亡所工夫、畢竟如何理會。圓頓法門、非小根劣智、所能擬議。無米索炊、畫空成繪、反不若因果殊感者、自得心開耳。

問、經末先言不退、後明往生、正以現生取辦、超乎餘教。何反開少壽多障、不克往生來世得生一路。

答、真念佛、決無不生淨土。退菩提者、第恐障深慧淺之流、見自他未效、不罪工夫淺、肉眼昧、反疑佛法無靈。現生退惰、故曲顯勝益、策令現生取辦也。

問、顯密並圓、何云持名勝準提。

答、極準提神力、肉身往詣十方淨土。極念佛三昧、肉眼等見十方如來。誠無勝劣。然約生佛因緣法門、所被通途教意、理應獨顯今宗。

問、參究念佛、謂向上一著、千聖不傳、必從參究方得。既一代時教、皆屬他寶、何禪門公案、便屬家珍。若云、禪是教之綱領、何故世尊不說。若云、經文亦可參究、又何勞千七百則耶。參話一節、迦文既未拈示、西來亦無此門。若謂門庭既熟、便成窠臼、故換此法。今參話亦成熟路、更換一法何如。

答、向上一著、千聖不傳、可云必從參究得耶。然亦一種方便、本無實法綴人、故古稱敲門瓦子。何常以公案作家珍。苟味綱宗、死在句下、謂參話方能悟道、病參話亦成門庭。皆益戲談、何關宗教。當知舉一明三、目機銖兩之士、隨拈一法、透一切法、盡屬家珍。誰爲他寶。若緣木求魚、守株待兔、三藏十二部、是拭瘡疣紙。千七百公案、亦陳腐葛藤。法無得失、得失在人。但當因言會心、何得迷心逐語。果契心源、知佛祖皆無

一法與人、將以何法換去何法耶。

問、五逆可以往生、佛何不能滅定業耶。又造業人若借此自寬、豈不入地獄如箭射耶。

答、千年暗室、一燈能破、懺力既殷、業便無定。若頑愚迷津、得船不上、牽裳作筏、抱石爲舟、既無迴轉之力、是真定業難逃矣。

問、涅槃法師、以未誦彌陀經、不得往生。法華云、聞此經如說修行、命終生安樂世界、何不同耶。

答、淨土一門、願爲前導、未誦彌陀、卽平日願樂不深。若法華所云、是世尊直以妙經、爲蓮邦左券、勸願明矣。法華卽是彌陀、妙經勸願、卽是彌陀勸願、卽是涅槃勸願、亦卽是一切諸經勸願、無不同也。

問、彼土爲人天錯居、爲各分九品、佛浴池、及菩薩聲聞、爲在天上、在人間。既住彼境、應令依正條然。

答、淨土純樂、天人豈應超絕、九品往生、未判人天、或皆九華化生、或天不須託質、皆未可知。大本謂宮殿樓閣、有在池者、在空者、觀經謂樹上寶網、妙華宮殿、諸天童子、自然在中。然則淨界莊嚴、豈可凡情測量、俾其條然耶。

問、淨土既宣道品、何觀經只言讀誦大乘、不及小乘。又淨業門、有不禮餘佛、不誦餘經者、不併違觀經耶。

答、般若每列三十七品、隨結云、乃至一切智智清淨、無二無三無別無斷故、道品豈非大乘法門耶。淨業古宿、有一門深入者、乃圓人禮一佛、卽禮一切佛。誦一經、卽誦一切經。恆沙寶性、無量法藏、一齊委付、一時領知。大乘方等經典、須如是讀誦始得。問、一句彌陀、若不通種種法門、莫罄其致、乃云修餘法門、便屬二心、豈非受一非餘耶。

答、不知一切法卽一法、廣修誠屬二心。若一法中透一切法、專習卽是總持。佛行魔行、豈在法也。

問、瑩師以兜率近、判內院易生、鈔以論因不論地揀之。後言勝蓮雖超極樂、然樂邦近、何又論地耶。

答、皆論因也。勝蓮境界、去博地凡夫甚遠、不同彌陀近垂方便。十念便可成因、未有不能生極樂、而能生勝蓮者。但深信佛語、入淨土元闡、極樂未必不卽勝蓮。如情生徧計、疑極樂爲權施、則勝蓮遠矣。

問、鈔中蓮臺二義、今金剛臺、紫金臺、爲是房臺、是基臺。

答、汎言二義、若託質金臺、本在花內、基臺非所論也。

### 答印生問

問、參究念佛之說、當得話頭否。既恐今生不悟、來生難保。故用此法、以攝往生。然又恐爲參禪開一退步、當作何融通耶。一生參禪、臨終發願、何如。

答、衆生顛倒、轉說轉疑。吾今徹底道破、亦令當來諸有志者、毋泣歧路。既一門深入、何須疊牀架屋、更涉參究。但觀蓮宗諸祖、便知淨不須禪。若爲大事因緣、有疑未破、



欲罷不能、而行參究、正應殷勤回向西方。但觀永明等諸大祖師、便知禪決須淨、本分中事、了然可辨、何須曲爲融通也。信則便信、疑則別參。

答元賡問

記數之法、普被三根、上根不礙記、下根必須記。故總以數期之、俾利者卽此打成一片、而鈍者亦不失緣因善根。儻託言事理一如、不須記數。恐上智少、下愚多、不至忘失者幾希矣。

答鄧靖起問

念佛三昧、三昧中王、信不容易。但旣三根普被、又不宜一味說難。且七日一心不亂、不可判淺。夜夜抱佛眠、不可判深。蓋一心不亂、有事有理。事一心、已不容易。理一心、何容強臻。而共眠共起之佛、不過本具性靈、蠢動皆爾、非關修證、殊未希奇。若達共起共眠之佛、仍熾然言念無間、方得名理一心。若未達共起共眠之佛、一味言念他佛、念至打成一片、得見他佛、卽頓悟共起共眠之佛矣。勢至云、不假方便、自得心開。

十六觀云、諸佛有異方便、令汝得見、此之謂也。故一聲彌陀、無論解與不解、如染香人、身有香氣、念念都是成佛真因。而漫云炒沙成飯、不幾謗三世諸佛、大方便法輪乎。

### 答比丘戒問

持戒念佛、本是一門、淨戒爲因、淨土爲果。若以持名爲徑、學律爲紆。既違願命誠言、豈成念佛三昧。多纏障垢、淨土豈生。夫如海無涯、豈不廣大。保任解脫、豈不簡易。故一心念佛者、必思止惡防非、而專精律學。專精律學者、方能決定往生。而一心念佛、現在紹隆僧寶、臨終上品上生。法門之妙、孰過於此。只一大事、何得乖張取笑識者。

### 普說

#### 歙西豐南仁義院普說

摘鈔

諸仁者、最初一步。果欲超生脫死、第一不得意見卜度。第二不得氣魄承當。第三不得雜名利心。適閩之南、適燕之北、路頭一錯、愈趨愈遠。此實言言血淚、字字痛心。祇

恐愁人莫向無愁說、說與無愁總不知耳。諸仁者還知愁麼。佛言得人身者如爪上土、失人身者如大地土、一口氣不來、便向驢胎馬腹、胡鑽亂撞、動經千生百劫、得出頭來、知是幾時。况末世邪師說法、如恆河沙、一盲引衆盲、相牽入火坑。故永明大師云、無禪有淨土、萬修萬人去、有禪無淨土、十人九錯路。我憨翁大師又云、今時若有禪無淨、奚止十人九錯。敢保十一箇錯在、此皆深慈大悲。真語實語、伏願諸仁者、莫墮狂野覆轍、直須痛念無常、信願念佛、求生淨土。此身不向今生度、更向何生度、此身珍重。

歙浦天馬院普說 摘鈔

金剛經如幻如夢者、爲破凡外二乘、我法二執言之。夫夢境雖空、而夢心卽是覺心。幻事雖虛、而幻本亦不全虛。泡雖無實、而非無水。影雖無實、而非無質。則知六凡生死往還、雖如幻夢、而佛性亦不斷滅、但日用不知耳。菩薩了知、現前一念心性、亙古亙今、本不生滅、上等諸佛、下等衆生、雖欲不上求下化不可也。然雖發大菩提心、無

始虛妄無明習重、觀力輕微、恐易退轉。必須將此圓解、專念阿彌陀佛、求生極樂世界。蓋吾現前一念心性、既本豎窮橫徧、則本具無邊刹海。於我心性無邊刹海中、實有十萬億刹外之極樂世界。實有現在阿彌陀佛。先證心性、慈悲接引。一切迷流、我今以此菩提心力、稱彼名號、便與阿彌陀佛、如空合空、水合水。故稱名一聲、卽一聲、一心不亂、稱名十聲、卽十聲、一心不亂。乃至稱名七日、卽七日、一心不亂。以正稱名時、更無二心、更無可亂也。或謂十惡五逆、臨終十念、尙得往生、何必平日矻矻稱名、此大不然。經云、十惡五逆、得往生者、必過去曾種菩提種子。若無菩提種子、何能遇善友。縱遇善友勸發、亦何能頓生信願、稱念洪名耶。故凡修心淨業之士、急須薦取妙心、發菩提願、稱念阿彌陀佛。雖不斷惑、亦能帶業往生、橫超三界、乃不可思議法門。十方諸佛、以無量舌、無量音、歎此法門、猶莫能盡。應當諦信而力行之。

## 茶話

### 答卓左車茶話

原問隱山啓附

上堂則超佛越祖、接衆則權引中下、此流俗宗匠、未悟心法者、所必墮之窠臼。致禪教律及淨土諸法、俱失綱宗、俱成實法。智者無所適從、愚人蔑棄一切、有自來也。佛言、若人專念彌陀佛、是名無上深妙禪。如今弄虚頭、逞精魂漢、一味胡言亂語、定不如真實參究念佛的人。甯爲上上人、撥無淨土、令悟土卽心。不應爲中下人、收作權乘、破壞眞法。况法王於法自在、隨時應機、自無成見。何必依他古宿、揚禪抑淨、伏乞豎吹毛劍、擊塗毒鼓、大轉法輪。如何是念佛門中、通身入理、向上一路、直踏毗盧頂上行作略。如何是學人初下手時、便離四句、絕百非、念佛。如何是念佛人、最後極淆訛處、腦後一鎚。從來宗門語句、壁立萬仞、一涉淨土、定屬廉纖。冀和尚將向來自性彌陀、唯心淨土等、撇向一邊、親見如來境界、快說一番、震動大千世界。

宗乘與淨土、二俱勝妙法。衆生根性異、不免隨機說。向上一著、非禪非淨、卽禪卽淨。才言參究、已是曲爲下根。果大丈夫、自應諦信、是心作佛、是心是佛。設一念與佛有

隔、不名念佛三昧。若念念與佛無間、何勞更問阿誰。故參究誰字、與攝心數息、皆非淨土極則事也。淨土極則事、無念外之佛。爲念所念、無佛外之念。能念於佛、正下手時、便不落四句百非、通身拶入。但見阿彌陀佛一毛孔光、卽見十方無量諸佛。但生西方極樂一佛國土、卽生十方諸佛淨土。此是向上一路。若捨現前彌陀、別言自性彌陀。捨西方淨土、別言唯心淨土。此是淆訛公案。經云、三賢十聖住果位、唯佛一人居淨土。此是腦後一鎚。普賢十大願王導歸極樂、誰敢判作權乘。憶佛念佛、不假方便、自得心開、誰謂定屬廉纖。但能深信此門、依信立願、依願起行、則念念流出無量如來、徧坐十方微塵國土、轉大法輪。照古照今、非爲分外、何止震動大千世界而已。欲知衲僧家事、不妨借中峯一偈、通箇消息。偈曰、禪外不曾譚淨土、須知淨土外無禪。兩重公案都拈却、熊耳峯開五葉蓮。

### 示念佛法門

念佛法門、別無奇特、只深信力行爲要耳。佛云、若人但念彌陀佛、是名無上深妙禪。

天台云、四種三昧、同名念佛。念佛三昧、三昧中王。雲棲云、一句阿彌陀佛、該羅八教、圓攝五宗。可惜今人、將念佛看做淺近勾當、謂愚夫愚婦工夫。所以信既不深、行亦不力。終日悠悠、淨功莫尅。設有巧設方便、欲深明此三昧者、動以參究誰字爲向上。殊不知現前一念能念之心、本自離過絕非、不消作意離絕。卽現前一句所念之佛、亦本自超情離計、何勞說妙譚玄。祇貴信得及、守得穩、直下念去、或晝夜十萬五萬三萬、以決定不缺爲準。畢此一生、誓無變改。若不得往生者、三世諸佛、便爲誑語。一得往生、永無退轉。種種法門、咸得現前。切忌今日張三、明日李四。遇教下人、又思尋章摘句。遇宗門人、又思參究問答。遇持律人、又思搭衣用鉢。此則頭頭不了、帳帳不清。豈知念得阿彌陀佛、三藏十二部、極則教理、都在裏許。千七百公案、向上機關、亦在裏許。三千威儀、八萬細行、三聚淨戒、亦在裏許。真能念佛、放下身心世界、卽大布施。真能念佛、不復起貪瞋癡、卽大持戒。真能念佛、不計是非人我、卽大忍辱。真能念佛、不稍間斷夾雜、卽大精進。真能念佛、不復妄想馳逐、卽大禪定。真能念佛、不爲他

岐所惑、卽大智慧。試自檢點、若身心世界、猶未放下。貪瞋癡念、猶自現起。是非人我、猶自掛懷。間斷夾雜、猶未除盡。妄想馳逐、猶未永滅。種種他岐、猶能惑志。便不爲真念佛也。要到一心不亂境界、亦無他術。最初下手、須用數珠。記得分明、刻定課程。決定無缺、久久純熟、不念自念、然後記數亦得、不記亦得。若初心便要說好看話、要不著相、要學圓融自在、總是信不深、行不力。饒你講得十二分教、下得千七百轉語、皆是生死岸邊事。臨命終時、決用不著。珍重。

### 示念佛三昧

念佛三昧、名寶王三昧、三昧中王。凡偏圓權實種種三昧、無不從此三昧流出、無不還歸此三昧門。蓋至圓頓之要旨、亦三根普利之巧便也。衆生心性、一而已矣。只此一心、法爾具真如生滅二門。正隨緣而不變、名真如門。卽不變而隨緣、名生滅門。依真如門、說圓實教。依生滅門、說偏權教。離真如無生滅、權是實家之權、故可爲實施權。離生滅無真如、實是權家之實、故須開權顯實。爲實施權、有藏通別教之三。開權



顯實、統惟圓教之一。權實四教、無非念佛法門。所謂念自佛、念他佛、雙念自他佛。約四教成十二種念佛三昧。又常行等四種三昧、同名念佛。一一三昧、各具十二、則四十八種。復次念他佛者、或念相好、念法門、念實相、以例念自念雙、亦可各三。廣歷四三昧、四教、則一百四十四種。一一種復有無量境觀差別、非言可宣。而持名一法、出佛說阿彌陀經、仍在前來種種三昧之外。觀經云、汝若不能念彼佛者、應稱無量壽佛、名字是也。此持名法門、雖似曲爲中下、仍復最頓最圓。蓋所持之名、無論解與不解、當體無非一境三諦。能持之心、無論達與不達、當體無非一心三觀。請嘗言之、六字彌陀爲因名故名、爲因心故名、爲亦名亦心故名、爲非心非名故名。若因名故名、名應自持、何待心持。又名能自持、與心何預。若因心故名、是心本有名、則不持時、名何不現。若亦名亦心故名、名能有名、何待於心。心能有名、何待於名。又此名字誰半屬名、誰半屬心。且不持時、名中半名雖無、心中半名應在、離既各無、合云何有。若非名非心故名、既非名非心、何能更有彌陀名字。如此推名、名字性空、緣生幻有。一名

字性、卽一切名字性、名字卽法界中道實相。舉一全收、無一法在名字外。所念境諦  
既爾、能念觀智、例此可知。復次、束此境三、總名妙假、舉正報、該依報、舉化主、該徒衆、  
舉假名、該實法、一句名號、三千歷然故。復次、束此觀三、總名爲空、以覓心無朕故。復  
次、名若是心、復何爲名。名若非心、心何持名。心若是名、復何爲心。心若非名、名何預  
心。於其中間、無是非是、豈非卽中。虎溪云、境爲妙假、觀爲空、境觀雙亡卽是中。亡照  
何嘗有先後、一心圓絕了無蹤、此之謂也。悟此理而持名、則一稱一念、頓圓無上菩  
提。縱未悟而捻珠記數、矻矻窮年、未嘗不暗合道妙、全在妙境妙觀之中。久久熏習、  
性德漸顯。如染香人、身有香氣、不假方便、自得心開。此蓮宗諸祖、所以極力宏揚也。  
誰有智者、捨此別求岐徑哉。

說

### 念佛三昧說

全城章絜之述、乃翁字衡、生平實行、臨終念佛坐逝。及其先慈武碩人、得秉歸戒、正

念善終因緣。乞予一言。莊嚴淨土。淨名經云。若欲淨土。當淨其心。二先尊心既淨矣。土安得不淨乎。且居士孝思不匱。深向法門。心又淨矣。土安得不加淨乎。是何俟予言。而予始可以言也。妙宗鈔云。五濁輕則同居土淨。體空巧方便土淨。圓三觀實報土淨。究竟證寂光土淨。夫淨土之道。若大路然。固不難知。淨土之理。若大海然。豈一蹴盡乎。令先人五濁習輕。同居之淨。蓋可必也。至於淨方便。實報。寂光。善繼善述。全賴君之孝思。居士但諦審諦觀。此一念孝思。在內耶。在外在中間耶。過去耶。現在未來耶。青黃赤白耶。長短方圓耶。自生耶。他生。共生。無因生耶。有耶無耶。亦有亦無。非有非無耶。如是觀已。於心無所取。於法無所著。了知孝思。當體即空。即假。即中。即空。故見思淨。即假。故塵沙淨。即中。故無明淨。三惑淨。故三土亦淨。自心三土淨。故父母三土隨淨。以無心外之父母故。如觀一念孝思。任運能淨三惑。觀一切善念。一切惡念。一切無記念。亦復如是。是名覺意三昧。亦名念佛三昧。以知自心即空。得見化身佛。知自心即假。得見報身佛。知自心即中。得見法身佛。如觀自心。能見三佛。則念三

佛亦卽顯發自心三德。故曰觀身實相、觀佛亦然。觀佛實相、觀身亦然。生佛不二、父子一體。能度所度、俱不思議。慎毋曰、但向父母未生前薦取也。饒你說箇父母未生、早已有無邊生死、而只向現前一念覷破、何嘗是父母生的。故曰、十世古今、始終不離於當念。了卻目前、更無賸法、深思之。

### 孕蓮說

癸未冬、予宏法華於普德。李石蘭居士、忘其齒爵、最先皈依。時有求子凡情、予名曰淨育。越三年、則轉其求子之心、塑佛像、朝夕戀慕、一意求生淨土矣。予語之曰、世間生育、膿血雜亂、安得稱淨。惟蓮花化生、乃真淨育。居士當別號孕蓮、予更請以要訣券焉。古人謂愛不重、不生娑婆、念不一、不生極樂。居士既不求子、則愛已輕。又能塑佛、則念已一。乃更有要訣者、蓋莫切於是心作佛、是心是佛二語也。夫梅檀不過世間木耳、燒則成灰、雕則成像、豈非隨心所作乎。旣成像矣、朝夕禮拜瞻對、朝夕在心目中、心外無佛、豈非卽心而是乎。若知所雕佛像的的心作心是、則知極樂彌陀、亦

的的心作心是也。若知極樂彌陀、心作心是、則知十方三世一切諸佛、亦的的心作心是也。若知一切諸佛、心作心是、則知一切淨土、亦的的心作心是也。以唯心淨因、育唯心淨果。無生而生、生即無生。操此券而猶墮疑城、斷不可得。悟此訣而猶謂淨土法門、不至圓頓、尤不可得矣。

持名念佛歷九品淨四土說

若欲速脫輪迴之苦、莫如持名念佛、求生極樂世界。若欲決定得生極樂世界、又莫如以信爲前導、願爲後鞭。信得決、願得切、雖散心念佛、亦必往生。信不真、願不猛、雖一心不亂、亦不得生。云何爲信、一者信阿彌陀佛願力、二者信釋迦文佛教語、三者信六方諸佛讚歎。夫世間正人君子、便無妄語。况彌陀釋迦六方諸佛、豈有妄語。此而不信、真不可救。故須先生深信、勿起疑惑。云何爲願、一切時中、厭惡娑婆生死之苦、欣慕淨土菩提之樂。隨有所作、若善若惡、善則迴向求生、惡則懺願求生、更無二志、是名爲願。信願既具、則念佛方爲正行。改惡修善、皆爲助行。隨功力之淺深、以分

九品四土，纖毫不濫。只須自己簡察，不必旁問他人。謂深信切願念佛，而念佛時，心多散亂者，卽是下品下生。深信切願念佛，而念佛時散亂漸少者，卽是下品中生。深信切願念佛，而念佛時便不散亂者，卽是上品上生。念到事一心不亂，不起貪瞋癡者，卽是中三品生。念到事一心不亂，任運先斷見思塵沙，亦能伏斷無明者，卽是上三品生。故信願持名者，能歷九品的確不謬也。又信願持名，消伏業障，帶惑往生，卽是凡聖同居淨土。信願持名，見思斷盡而往生者，卽是方便有餘淨土。信願持名，豁破一分無明，而往生者，卽是實報莊嚴淨土。信願持名，持到究竟之處，無明斷盡，而往生者，卽是常寂光淨土。故持名能淨四土，亦的確不謬也。問曰：如何持名，能斷無明。答曰：所持之佛名，無論悟與不悟，無非一境三諦。能持之念心，無論達與不達，無非一心三觀。只爲衆生妄想執著，情見分別，所以不契圓常。殊不知能持者，卽是始覺，所持者，卽是本覺。今直下持去，持外無佛，佛外無持，能所不二，則始覺合乎本覺，名究竟覺矣。問曰：旣始覺合本，則當下卽常寂光，如何亦說往生。答曰：若達當下卽

常寂光、又何妨說箇往生。蓋往卽非往、非往而往。生卽無生、無生而生。文殊善財之生西方者此也。咄哉男子、無措思維。

文

惠應寺放生社普勸戒殺念佛文

夫物雖至微、未有不貪生惡死者。此貪生惡死之心、全是煩惱。亦全是靈知靈覺所發現也。吾人貪生惡死、情與物同。苟充此情、所欲與聚、所惡勿施、安得不是靈知靈覺。苟昧此情、但知我生可貪、不知他亦貪生。我死可惡、不知他亦惡死。安得不是煩惱。是故若欲放生、先須戒殺。欲拔生死煩惱、必須深心念佛。深心者、自救救他之心。佛者靈知靈覺之極致。深心念佛者、以自救救他之心。契於靈知靈覺之極致、令若自若他、念念解脫者也。以此爲正行、以不殺大悲、放生大慈助嚴之、必生極樂蓮華化現、永脫輪迴之苦。所以修曇禪友、公路居士等、盡心竭力、普皆勸請也。有緣遇此佛圖、便請專精受持。展轉勸人、功德尤爲不可思議。當知生佛同體、佛者無上衆生。

衆生者卽未來諸佛。一念一切念、一切念一念可也。

### 偶錄一

#### 梵室偶談

念佛第一品人、頓悟自心是佛、念念圓明。第二品人、深信自心作佛、念念入理。第三品人、深信佛力無量、念念滅惡。此復四種、謂念佛自性、念佛相好功德、念佛名號、念佛形像、此四各通三品也。或問予汝何願、願生西方。更何願、願入地獄。曰、是何心哉。曰、西方則上事諸佛。地獄則下度衆生。佛從彌陀始、願王勝故。生從地獄始、悲心切故。人謂參禪則悟道、不必求生西方。念佛則生西、未必卽能悟道。不知悟後、尙不可不生西方、况未必悟耶。又禪者欲生西方、不必改爲念佛、但具信願、則參禪卽淨土行也。又念佛至一心不亂、能所兩忘、卽得無生法忍、豈非悟道。故參禪念佛、俱能悟道、俱能生西也。但有疑則參、無疑則念、在人下手時自酌耳。雲棲大師發揮念佛法門。曰、有事一心不亂、理一心不亂。說者謂持名號是事一心、參誰字是理一



心亦何譌也。夫事一心者、歷歷分明、不昏不散是也。理一心者、默契無生、洞明白性是也。是參時話頭純熟、猶屬事門、念時心佛兩忘、卽歸理域、安得事獨指念、理獨指參也。又參誰字謂之究理則可、謂理一心不可。然非其人、卽究理亦未可輕易。何以故事有挾理之功、理無隻立之能、幸審思之。

書

復淨禪

淨土一門、本該一切宗教、普收一切羣機。故從上佛祖聖賢、著述亦最富博。欲摘其精要、利益羣品、須備採衆長、證以心悟、方可流傳。若此門未遵堂奧、宜事力修、無不急以著述爲事也。度人要務、以智慧方便爲本。有智慧則能究權實理。稱理而說、義無不周。有方便則能莊嚴文章。文如於義、觀者咸悅。今周集理致僅七八分、文章僅五六分、似宜邃養、更加錘鍊爲妙。意周所熟玩者、但彌陀疏鈔、龍舒淨土等文。恐妙宗鈔一書、尙未窮研。乞勸細細尋繹、參以十疑或問、淨土指歸、寶王三昧、西方合論

等書，畢竟更有大豁眼處。然後以慈悲心，觀此方機宜，採集一言半句，以利益之功，德更殊勝矣。

### 復鄧靖起

參禪念佛，善用無非是藥，不善用無不添病。又或執藥是病，或借病爲藥，事非一概，未可片言盡也。生死事大，佛道元妙，縱一知半見，小小功夫，尙不濟事，况一味死在句下者乎。禪本無參，佛本無念，二語亦是醍醐，亦是毒藥。今之呼蒼天，呵佛祖者，正墮無參無念坑中。若真參真念，決不作此狂態矣。

### 與周洗心

不可說破，恐塞悟門，是參究一途，別方便耳。宗門亦不妨直直說破者，况教觀，况淨土耶。淨土的旨，全在妙宗一書，縱持名不修觀，可不達四土橫豎之致乎。西方合論，亦淨土有功之書，不肖圓通文句一則，收盡念佛三昧綱宗，但言簡義富，乃提綱挈領之學，非徧探一代時教，不足盡數千言中所包攝也。儻專辦己事，未暇利人，只

晝夜彌陀十萬聲。且求往生、一切宗教眼目、不必作意求通、但得見彌陀、何愁不開悟。自是一論、若大悲爲人、思垂言句、必令十分精瑩、庶可普利三根。不然、一法才立、一弊旋生。况末世禪教淨土、種種語錄、充楹積棟、安事更以雜而未純之作、與流俗鬪富哉。法號漫作一文、其中理路、頗爲入道之要、當依義不依文可也。

寄丁蓮侶

淨土一門、有名無義久矣。居士躬行實踐、爲緇素標榜、此彌陀願光所映發也。但末世往往視作曲爲中下、不知其至圓至頓、普被三根。須將妙宗鈔、及西方合論二書、深玩熟思、庶可破邪計耳。

復韓朝集

淨土痛快直捷、廣大圓融、至頓至易、無機不收、無罪不滅。仁者初發心、便知歸向。胡三十餘年、猶半信半疑。特錄往生公案二則、以助信力、萬勿更躊躇也。但觀察現前一念、緣起無生、罪源自涸。此事甚不難、人看得難耳。

復唐宜之

妙宗鈔一書、不可動一字。蓋大小彌陀經、普被三根、註須通淺深。此經專被章提希等圓頓大根、令現悟無生忍。儻作是一心之旨未徹、斷無依事修觀之理。雲棲謂心粗境細、妙觀難成。本諸善導等諸大祖師、信非臆說。旭謂宋時根性稍利、四明發揮猶略。若今大師復作、只可詳釋、何容節要。大匠不爲拙工、改廢繩墨。羿不爲拙射、變其穀率。此係不少。倘圓解不十二分透徹、便欲作觀、未有不招魔事者。唯持名一法、千穩百當、而圖經及妙宗鈔、姑與人結圓頓種。或衆生根性、不可妄測、亦自有能解者。若解決不嫌多、若未解刪之、於彼何益。且刪淺存深、初機益不能解。若刪深存淺、大違經宗。進退思之、萬勿萌此念也。

秘藏指南卷上終

## 秘藏指南卷下

淨業學人趙鉞編次

論

### 參究念佛論

原夫本覺妙明、真如法界。智理無能所之分、依正絕自他之量。祇因迷妄、徧計橫生。背覺性而九界雜陳、昧真境而三土幻現。勞我世尊、垂慈設教、隨衆生根性、示無量法門。或顯了說、或隱覆談。或曲接偏機、漸令入道。或直投圓種、頓使開明。或從一法中、分別說爲無量。或以異方便善巧助顯一乘。雖復教網萬殊、無非醒九界長夢、令復還元覺。了三土幻翳、令冥契寂光耳。然了義中最了義、圓頓中極圓頓、方便中第一方便、無如淨土一門。何以言之、隨其心淨、則佛土淨。見思淨、超同居。塵沙淨、超方便。無明淨、超實報。故曰、惟佛一人居淨土、尙何不了之義。衆生心念佛時、是心作佛、是心是佛、以一念頓入佛海。故曰、一稱南無佛、皆已成佛道。若人專念彌陀佛、是名

無上深妙禪，豈不至圓至頓。果德願力，不可思議。因心信力，亦不可思議。感應道交，文成印壞。以凡夫而階不退，未斷惑而得橫超。又復三根普被，四土橫該。五濁輕淨，在同居。體空巧淨，在方便。三觀圓淨，在實報。究竟覺淨，在寂光。尙無等者，矧或過之。是名不可思議功德，世間難信之法也。總其大要，須具信願行三。信則信事，信理，信自，信他。信因，信果。知心外無土，土外無心性，外無佛，佛外無性。因必該果，果必徹因。願則念念回向，心心趨往。行則無量法門，會歸一致。而淨土正行，尤以念佛爲首。願念佛一行，乃有多途。小經重持名，楞嚴但憶念。觀經主於觀境，大集觀佛實相。後世智徹禪師，復開參究一路。雲棲大師，極力主張淨土，亦不廢其說。旣與禪宗相濫，不無淆訛可商。嘗試論之，心佛衆生，三無差別。果能諦信，斯直知歸。未了之人，不妨疑著。故誰字公案，曲被時機，有大利，亦有大害。言大利者，以念或疲緩，令彼深追力究，助發良多。又未明念性本空，能所不二，藉此爲敲門瓦子，皆有深益。必淨土爲主，參究助之，徹與未徹，始不障往生。言大害者，旣涉參究，便單恃己靈，不求佛力。但欲現

世發明、不復願往。或因疑生障、謂不能生。甚則廢置萬行、棄捨經典。古人本意、原欲攝禪歸淨、於禪宗開此權機。今人錯會、多至捨淨從禪、於淨宗翻成破法。全乖淨業正因、安冀往生彼國。問、淨土爲主、參究可當念佛否。答、參念皆屬行攝、切則參亦往生、不切則念亦不生。又雖有切行、若信願爲導、則往生。無信願爲導、則不生也。問、徹悟人還須往生否。答、普賢願王、導歸極樂。初地至十地、皆云不離念佛。怡山發願、承事十方諸佛、無有疲勞。百丈清規、課誦送亡等事、無不指歸淨土。故天如云、若果悟道、淨土之生、萬牛莫挽。雲棲云、悟後不願往生、敢保老兄未悟。是知凡言不必生淨土者、皆是增上慢人、非真入菩薩位者也。問、念佛兼參究、可爲助行。參禪兼願往、非偷心歟。答、無禪之淨土、非真淨土。無淨土之禪、非真禪。然淨土之禪、本不須參究。但一心不亂卽靜、名號歷然卽慮。若夫禪之淨土、必須證極淨心、非可以理奪事。從上諸祖、凡情已盡、聖解未忘、不妨隨機掃執。後世學人、雖有乾慧、而染習未枯、自非發願往生、依舊隨業輪轉。永明四料簡、楚石十念不缺等、正所謂有禪有淨、豈偷心也。

問、參究念佛、與止觀法門、爲同爲異。答、理則互融、門實有異。止觀以信入、參究以疑入。止觀雖三根普被、而上根方真得明了。參究雖亦被三根、而上根始獲大總持。且如下根之人、或念佛、或參究。雖未達止觀深理、然理無不具。以置心一處卽止、用心參究卽觀。故中根之人、或借解而起念行、或塞解而發參情。雖隨機致用不同、亦皆不失止觀大義。唯上根之士、直下相應、境智一如、觀諦不二。斯時念與不念、皆得而究竟、更無可參。何以故、言前薦得、屈我宗風。句下分明、沈埋佛祖。故知參究念佛之說、是權非實、是助非正。雖不可廢、尤不可執。廢則缺萬行中一行、執則以一行而礙萬行也。高明學道之士、試熟計而力行之。

### 念佛卽禪觀論

或問、蕩益子曰、參禪教觀、與念佛法門、同耶、異耶。答曰、同異、皆戲論也。卽亦同亦異、非同非異、亦戲論也。以三種法門、無不離四句故。若知一切法、無不卽心自性、仍可四句而詮顯之。何者、梵語禪那、此云靜慮。靜卽是定、慮卽是慧。靜卽止、慮卽觀。靜卽



寂慮卽照，是故定慧也。止觀也，寂照也，皆一體而異名也。或謂寂照約性，餘二約修。止觀約因，定慧約果，不過一往語耳。夫吾人現前一念心性，雖昏迷倒惑，靈知終不可滅。雖流轉紛擾，本體終未嘗動。此豈非寂照真源，止觀血脈，定慧根據乎？究此現前一念心性，名爲參禪。達此現前一念心性，名爲止觀。思維憶持此現前一念心性，佛之不同。若單念自佛，與參禪止觀全同。若單念他佛，與參禪止觀亦異亦同。若雙念自他佛，與參禪止觀，非異非同。夫念自佛者，是四念處觀。所謂觀身、觀受、觀心、觀法。若一切法門，不爲四念處所攝者，卽外道法。故知與禪觀同也。夫念他佛者，或念相好，或法門，或實相，或不能作此三種念者，則但持名號。若念相好，一往似與禪觀異，然必止息異緣，專觀彼佛，則仍與靜慮同也。念法門者，例此可知。若念實相，雖托他果佛爲異，然終無兩種實相，究竟是同。若持名號，一往亦與禪觀異，然無論解與不解，而所持之名，當體無非一境三諦。能持之心，當體無非一心三觀。故曰，明珠投

於濁水、濁水不得不清。佛號投於亂心、亂心不得不一。是則心無異緣、卽是靜是止。名號歷歷、卽是慮是觀、亦究竟同也。夫雙念自他佛者、了知心佛衆生、三無差別。乃托他佛、助顯本性。由悟本性故、與禪觀非異。由托他佛故、與禪觀非同。是謂勝異方便、無上法門。文殊般若經、般舟三昧經、觀無量壽佛經等、皆明此圓頓了義、而妙宗鈔申之爲詳。凡棲心淨土之士、不可不熟究而力行之也。

緣起

靈峯寺淨業緣起

嘗觀淨土之爲勝異、正不在寂光寶報方便、而在同居。蓋三土斷惑乃生、惟同居直以信願相導、感應道交。五濁之習稍輕、三界之苦斯脫。而又卽此西方極樂、豎徹方便實報寂光。故下愚皆可登其闕、上智終莫踰其闕。三根普資、四悉咸備。正法住世、諸祖已共宏揚。末運迷津、四依能無獨贊。乃世之駕言直指者、以西方爲鈍置。學語大乘者、以淨土爲退休。不思不假方便、自得心開。安有如斯曲徑。妙華盛滅、徧供億

方安有如斯小乘。且既悟直指，是名見性成佛，何故拒彌陀於自性之外。既乘大願，必須嚴淨國土，何故揀極樂於刹海之中。夫聲聞權教，不聞他方佛名，四果神力，僅周三千界內。彼十萬遐方，尊特善逝，非勝蓮大士，勇猛丈夫，孰能親近承事。甫育蓮臺，便階跋致。較矢心參究，期尅三生，已悟心宗，猶曰生生不退，佛階可期者，難易遲速，皎然可知。六方調御，同口讚揚，徧吉文殊，誠心勸發，豈欺我哉。法流震旦，禪律性相，皆法久弊生，勢窮須變，惟茲元猷，始匡嶽訖五雲，或刻蓮漏于六時，或發妙宗於三觀，或導萬善以同歸，或融一心於事理，法無不收，機無不攝，故得法流益久，法道愈光，聲化所洽，遠及山谷。鄞南靈峯講寺，石峨頎公，請雪航楫公，結社茲山，復有抱一粹沙彌，季清程居士，共稟彌陀宏願，同闡勢至法門，佛聲浩浩，偕松風鳥語，並顯圓通。僧德雍雍，率牧豎耕夫，同入三昧，橫超三界，無煩九次第修，豎徹寂光，不俟三僧祇證，誠劫濁津梁，昏衢寶炬也。

## 序

### 刻淨土懺序

無淨無穢、儻侗真如。卽穢卽淨、顛預佛性。信釋迦之誠語、悟法藏之願輪。始知若律若教若禪、無不從淨土法門流出、無不還歸淨土法門。予初志宗乘、苦參力究者數年。雖不敢起增上慢、自謂到家。而下手工夫得力、便謂淨土可以不生。逮一病瀕死、平日得力處、分毫俱用不着。方乃一意西歸。然猶不捨本參、擬附有禪有淨之科。至見博山後、稔知末代禪病、索性棄禪修淨。雖受因噎廢食之誚、弗恤也。於今專事淨業、復逾三載、熾然捨穢取淨。與不取捨、元非異轍。較西來祖意、豈不更直捷耶。每痛末世狂禪、烏空鼠卽、不惟撥無淨土、亦乃謗讟宗風。季清居士、因佛日寺刻六宗、遂任淨土一門、卽從懺儀始。此書十科行道、五悔鍊心、徹事理之源、極性修之致。如然和香一丸、飲海水一滴、何香不具、何水不沾、爰爲之序。

### 刻寶王三昧念佛直指序

念佛三昧、爲如來勝異方便。凡聖均收、利鈍悉被。以一念直歸佛海、至圓至頓、第一

了義故也。而迷義徇名者，見五逆衆惡，十念往生，反以爲專攝凡劣。但化鈍根，可謂味佛妙旨，謗讟深經矣。予慨末世行人，多疑多障，難悟難開。於深妙法門，非著事忘理，必執理撥事。著事者猶堪下品生因，執理者竟淪惡趣空見。至此而直指之道，翻成斷滅深坑。非藉金錍，誰抉翳眼。妙叶導師，法紹宗乘，教興蓮社。應永明角虎之記，暢寶王三昧之談。境觀並彰，纖疑悉破。闡惟心之致，依正宛然。示自性之源，感應不忒。俾達者以理融事，而理非事外。愚者因事入理，而事挾理功。誠除惑前矛，生西左券也。二百餘年，流通機塞。蓮大師欲見未能，而願力不磨。韓居士從萬融禪師處得之。予獲借觀，如飫醍醐。悲劫濁方殷，喜津梁有在。急謀付梓，以廣厥傳。普願見聞隨喜，種樂土圓因。讀誦思維，證寶王法印。轉相曉悟，共脫沈淪。庶不負希有良緣矣。

### 寓菴序

聲聞四枯、菩薩四榮、正眼觀之，名爲八倒。有句無句、雙亦雙非、悉檀說之，名爲四門。通此，可論六合之內、議六合之外矣。法華經云：三界無安，猶如火宅。又云：大火所燒。

時、我此土安隱。靈鷲一峯、果在三界外、抑在三界內耶。是故四依大士、具論四種淨土、必先明橫豎之致。豎則土土相殊、橫則土土相卽。惟其殊也、故見思未盡、不離同居。塵沙未盡、不離方便。無明未盡、不離實報。惟其卽也、故九界衆生、應念能覩佛境。圓滿妙覺、時時應現十方。應地獄以惡逆、有間無間是其寓。應餓鬼以慳貪、曠野山澤是其寓。應畜生以愚癡、水陸空界是其寓。應修羅以憍慢、須彌大海是其寓。應人道以五戒、四洲諸處是其寓。應欲天以十善、地居空居是其寓。應色無色以禪定、四禪四空是其寓。應聲聞以諦智、應緣覺以還滅、方便有餘是其寓。應菩薩以六度萬行、實報無障是其寓。彼能應者隨寓而安、迺所應者則隨寓皆著。是故凡夫永劫沈三界、二乘恆墮無爲坑。地前大士、同滯有餘。入聖高流、猶在果報。方其寓也、不知其寓也。嗟嗟、故鄉之夢、尙未全醒。客次之居、豈爲究竟。惟有秉隨智教、作稱性觀。悟寂光於介爾、始可辨寓義之真實矣。夫謂之寓、則一切法趣寓。身土一如、理事平等、斯亦究竟寓也。一究竟、一切究竟。實報方便同居、無非真淨。降此而分證、而相似觀行。

名字淺深之致異，所達之理同。苟昧此理，則誤認真實，固屬凡情。了知如幻，終名偏解，豈有當於寓義耶。映渤開士，名其室曰寓菴。毗邪丈室，彌勒寶樓，予拭目俟之矣。

### 修淨土懺并放生社序

淨土法門，原爲衆生迷本自性，不知常寂光理，生死浩然，無有休息，故藉彌陀勝願，爲增上緣因。其淨土有寂光實報方便同居四種，而上三土，非斷惑不生，還同豎出三界之義。故特指西方安養同居，使利根卽此頓淨四土，鈍根亦依此先脫苦輪。雖誠簡易，亦非草草。彌陀經云，不可以少善根福德因緣，得生彼國。一日乃至七日，執持名號，一心不亂，卽得往生。夫一心不亂，縱未斷惑，可不伏惑耶。倘娑婆事業，在在牽繫，遇五欲時，如膠如漆，遇逆緣時，結恨懷冤，而欲命終彌陀接引，此決不可得之數也。又觀經云，逆惡之人臨終十念，皆得往生。夫臨終十念，必深植善根。今逆順境緣，便不復有正念，何況臨終。且臨終苦現，止藉善友提撕。今青天白日，尙不能於明師友，真實格言，信受奉行。當臨終時，安保養善友現前，設現前開示，神識昏迷，而欲求

其信解。此又決不可得之數也。至五悔法。本爲無知造罪。無可奈何。教以發露披忱。修來改往。逆順十心。痛切懇到。非可視爲悠悠泛泛者。兼此四法。助成此行。勸請滅謗法魔障。隨喜滅嫉妬重障。迴向滅慳貪著。三有障。發願滅退失喜忘誤障。更有作法。取相。無生。三種懺儀。作法。依律所說。對首懺悔。取相。嚴淨道場。專求感應。無生。深觀實相。斷煩惱源。倘旋懺旋犯。作法之所不許。既不能依律作法。必不招賢感聖。既不覩聖賢一色一相。又何能頓證聖賢清淨法身。故三種法。前前不兼後。而能通後。後後必具前。而不廢前也。由此觀之。淨土法門。藥也。娑婆愛瞋。忌也。五悔法門。藥也。不斷相續。忌也。甫服其藥。又觸其忌。可乎。慈雲大師。合此二種巧妙方便。述爲往生懺儀。且云行人各有無始惡習。速求捨離。勿使行法。唐喪其功。藥忌昭然。亦可思矣。或謂聞白毫名字。功德不可限量。聞一佛二菩薩名。滅無數劫罪。豈現前惡法所能較敵。噫。誤矣。不觀占察經耶。經稱地藏菩薩。大悲願力。諸大菩薩。皆不能及。其言曰。能聞我名者。謂得決定信。利益行故。若雜亂垢心。稱誦我名字。不名爲聞。以不能生



決定信解故。蓋雜亂則無定，不與奢摩他相應。垢則無慧，不與毗婆舍那相應。不與二觀相應，則不知地藏法身。諸佛法身與自己法身無二無別，故不名爲聞也。智者大師釋十六觀經題，必約三德秘藏。釋法華經題，乃以九旬談妙。故曰：若聞首題名字，所得功德不可限量。若不如所解釋，安獲無量功德。今雜亂垢心，聞猶不聞。現行煩惱熾然不息，以此脫苦杯水投車。逮臨終無驗，翻疑佛法不靈。自誤誤他，墮謗法罪。如服藥食忌，反致喪身。遂謂醫王殺人，顛倒至此極矣。獨放生一事，捐所愛貲財，以贖彼命，弊端略少。然或重視大形，於微細蟲邊，生下劣想。或多視微物，於現前屠宰者，起慳吝心。或留意異類，偏於人中，妄隔怨親，愛憎不息。既昧平等慈心，無以爲念佛禮懺之本。智者大師云：雖入道場懺悔，惡心不轉，惡業不壞，無益苦行，唐喪劬勞，確白上下，竟有何益。雖舉手低頭，皆成佛道。戲著袈裟，猶爲遠因。豈六時勤苦，全無功用。但緣因力弱，不能敵現業流注耳。象岩開士，結往生懺社，買放生命，悲智並運。將此菩提心，爲往生正行，予申其說而示之。

觀泉開士化萬人畢生念佛同生淨土序

出世之要、莫尙願力。願者信所鍾、行所出也。無信則無願、不願可云信乎。無願則無行、願相續、非卽行相續乎。所以法藏比丘、四十八願旣發、阿彌陀佛、四種淨土斯嚴。從是以來、願願相續、卽是燈燈無盡。蓮宗諸祖、堪爲左券。觀泉一法友、刺血書法華、翹勤禮大悲、行法畢生、日念佛萬聲。今欲化他、謂萬聲局難取必、無論千百十下至一聲、但終身勿替、便決定橫超寶王三昧、謂一念得生、不我欺也。余嘉其說、卽此是往生公據、佛祖階梯。弁語以勸登斯籍者、便作標名蓮蕊想、不必別求圓頓、一念已超佛地矣。

惠應寺放生蓮社序

能儒氏之爲教也。大而博、深而不可晦、極六合內外不爲迂。余昔拘虛程朱之學、不惟望洋、復興斥鷃。今乃駸駸然入於其中、異哉能儒如來、觀音地藏、巧以勝異方便、轉我邪心、令生正信也。予因是得仰承如來威行、作獅子吼、徧破一切外道邪心。夫

物雖微、誰不愛命。只此愛命之心、便是眞常佛性。此心不在內、不在外、不在中間、非過去、非現在、非未來、非有非無、非亦有亦無、非非有非無。本自離過絕非、不可思議。迷此心性、眞常眞樂、眞我眞淨、妄認四大爲自身相、六塵緣影爲自心相。是故於中、分人分物、起愛起憎、惑業苦輪、循環不息。若能直下諦觀、現前一念心性、似局四大緣影中、實非四大緣影所能區局。如心佛亦爾、如佛衆生然。便知心佛衆生的、的、的、無差別。殺生卽殺自心未來諸佛、放生卽放自心未來諸佛。若放自心未來諸佛、卽眞念佛三昧。修此念佛三昧、是恆轉妙法華經百千萬億部也。我釋迦如來之道、未墜於地。良由含靈抱識、無不各具全體大用。今舉此全體大用、而爲社、爲文、爲詩、爲種種法語、豈復有文獻不足徵之嘆哉。故題其編曰、能儒文獻、而爲之序。

### 蓮漏清音序

經云、若欲淨土、先淨其心。隨其心淨、則佛土淨。此事理因果並彰之旨、自他權實不二之談也。而昧者一迷緣影爲心、決定惑爲色身之內、不知色身外洎山河大地虛

空。咸是妙明心中所現物。是故西方極樂世界。卽唯心淨土。現在樂邦教主。卽自性彌陀。四明妙宗鈔云。應佛顯。本性明。托外義成。唯心觀立。豈似愚人。妄認六塵緣影。爲自心相。遂置十萬億刹於心性之外哉。顧唯現前一念心性。覓不可得。是卽空義。炳現萬法。是卽假義。心外無法。法外無心。是卽中義。迷心卽空。名見思惑。迷心卽假。號塵沙惑。迷心卽中。稱無明惑。三惑旣熾。四土斯穢。今一心念佛。不計我我所。卽空義顯。隨念佛時。佛隨心現。便知十界。皆惟心造。卽假義顯。不惟是心作佛。亦是心是佛。卽中義顯。一心三義旣顯。便能圓破三惑。圓淨四土。仍於無次第中。假說次第。觀行破惑。同居土淨。相似破惑。方便土淨。分證破惑。實報土淨。究竟破惑。常寂光土。永得清淨。卽中故常。卽假故寂。卽空故光。又復三諦皆常。三惑皆寂。三智皆光。此一非一。舉一卽三。此三非三。言三卽一。不縱橫。不並別。不可思議。名秘密藏。阿彌陀佛。先證此也。一切衆生。久迷此也。吾人現前。注念此也。是謂念佛三昧。是謂心淨土淨。先悟後修。名理一心理一事亦一矣。先修後悟。名事一心事一理亦一矣。文殊一行。

三昧、普賢十大願王。遠公刻蓮漏於東林、雲栖號蓮池以明志、皆歸極於此也。丁蓮侶老居士深信篤行之餘、徧閱古今淨土法要。摘最警者、目爲蓮漏清音。始法勝、終現應、凡二十五章。條理井然、羣疑冰釋。夫疑非可強釋也、由本無可疑故也。因僭爲序如此。

### 勸念豆兒佛序

心之本覺曰佛、心之始覺曰念。顧本覺之在人心也、似異而恆同。乃始覺之隨人用也、雖同而恆異。是故背塵合覺、便名始覺。背覺合塵、便號無明。無明無體、卽以始覺爲體。始覺無相、卽以無明爲相。是故衆生念五欲時、卽名欲界無明。念四禪四空、卽名色無色界無明。念斷常、卽名邪見無明。念涅槃、卽名界外無明。惟有念佛之時、卽名始覺。故曰、諸佛正徧知海、從心想生。衆生心想佛時、是心卽是三十二相、八十種好、是心作佛、是心是佛。是故一切法門、無不從此念佛法門流出、無不攝入念佛門中。一念相應、一念佛、一日相應、一日佛。直捷圓頓、離見超情。馬祖卽心卽佛、蓋深得

乎此也。夫知卽心卽佛，斷無不念佛時矣。而迷者誤認緣影爲心，又妄謂心旣卽佛，便不須念。故不得已轉爲方便曰：非心非佛。又曰：不是心，不是佛，不是物等。此曲爲中下解粘去縛，非直指人心，見性成佛之本旨矣。後世逐塊韓盧，反以非心非佛，乃至種種險句爲奇特，以卽心卽佛爲平常。何異嗜巴豆大黃，吐棄膏粱美味者也。桐城有二人，結伴爲客。一死，伴葬之。攜貲還其婦，婦疑伴，伴憤甚，往屍處陳祭哭訴，鬼與伴問答如生前，乃同歸作證。中途遇事，偶一念阿彌陀佛，鬼大喚：何放光怖我，更速轉數念。鬼懼曰：汝一念，胸輒舒，五色光十餘丈，眩我心目，不能復近汝矣。歸語我婦，令自來，當與汝雪冤。伴因此醒悟，出家爲高僧。嗟嗟，甫舉一念，光輪便舒。故壽昌大師云：念佛心卽是佛也。豈今時念佛，他時成佛哉。惜鬼不種善根，不聞佛名，故驚怖。倘本念佛人，仗此良緣，豈不頓超樂土耶。畢貫之居士，參盡天下衲僧，乃死心念佛，求生淨土。兼勸人以豆念佛，結佛緣。人身一豆耳，當念佛時，身卽放光，所謂佛身充滿於法界者，非乎。今以豆念佛，豆必放光，以放光豆作放光食，入衆僧腹，無論其

人念佛不念佛、皆必恆放光明。令遇斯光者、有心無心、皆得解脫。光光相照、成無盡燈。則生界頓空、更不必別談向上、便是向上極則公案矣。僧問趙州、如何是毗盧師法身。州云、阿彌陀佛、阿彌陀佛、請以此誠言爲證。

### 悲華經序

大悲釋尊、能爲難事。較十方三世佛、偏稱勇猛。而悲華一經、敘述尤詳。此經亦名大乘大悲芬陀利經、謂攝取淨土菩薩如餘華。惟大悲苦行菩薩、如芬陀利華也。然釋尊成佛、刹海微塵數劫、爲衆生故、於恆沙劫前、示作寶海大臣。其長子成佛、名寶藏。既勸輪王千子、及諸小王、供佛發心、各取淨土。後獨發悲誓、願取穢土。嗚呼、我輩垢重障深、久爲十方佛所擯棄。聚此五濁世間、自非釋尊、徹底大悲、何由得聞出世法要。當知今日四衆弟子、無非昔日、曾飲大悲血、食大悲肉、受用大悲頭目腦髓、及餘身分者也。釋尊捨無量血肉身分、令我輩成菩提種。我輩猶復不思報恩、尙可爲人乎。經云、菩薩有四法懈怠、一願取淨世界。二願於淨衆作佛事。三願成佛、不說聲聞

辟支法。四願成佛。壽命無量。有四種精進。一願取不淨世界。二不淨人中作佛事。三成佛說三乘法。四成佛得中壽。此經宗要。概不出此。然懈怠菩薩。如恆河沙。而精進菩薩。迄今不滿十人。故釋尊雖自取穢土。仍勸穢土衆生。求生極樂。苦口叮嚀。不一而足。吾輩信大悲語。卽同大慈心。生極樂已。方可速入不淨世界。於不淨人中。說種種法。數示生滅。爲第一精進菩薩。吳興唐宜之。甫讀是經。不禁感泣。山東耿闇然。適聞是經。便誓流通。此皆釋尊真實眷屬。一切人中。芬陀利華也。此經久行世間。五濁不難度盡。深心隨喜。爲之序。

西方合論序

唯大徹大悟人。始可與談念佛三昧。否則百姓之與知與能。猶遠勝仁者見之謂之仁。智者見之謂之智也。達磨西來。事出非常。有大利。必有大害。嗚呼。先輩幸得大利。今徒有大害而已。誰能以悟道爲先鋒。以念佛爲後勁。穩趨無上覺路者耶。袁中郎少年穎悟。坐斷一時禪宿舌頭。不知者以爲聰慧文人也。後復又深入法界。歸心樂



國、述爲西方合論十卷、字字從真實悟門流出。故絕無一字蹈襲、又無一字杜撰。雖台宗堂奧、尙未詣極。而透徹禪機、融貫方山清涼教理無餘矣。或疑佛祖宗教、名衲老宿、未易徧通。何少年科第、五欲未除、乃克臻此。殊不知多生熏習、非偶然也。傳聞三袁、是宋三蘇後身。噫、中郎果是東坡、佛法乃大進矣。余每謂明朝功業士、遠不及漢唐宋、理學則大過之。陽明一人、直續孔顏心脈。佛門居士、唐梁肅、宋陳瓘、明袁宏道、蓋未可軒輊也。忠肅因初年、偶疑金剛爲泥人、背背語、遂爲禪者所笑。試讀彼三千有門頌、可復笑乎。中郎少年、風流灑落、亦爲緇素所忽。試讀彼西方合論、可或忽乎。嗚呼、今人不具看書眼、何怪乎以耳爲目也哉。特集吳門所刻標註、并爲評語、以表彰之。重謀付梓、用廣流通。普使法界有情、從此諦信念佛法門、至圓至頓、高超一切禪教律、統攝一切禪教律、不復有泣歧之歎也。

### 重刻寶王三昧念佛直指序

念佛三昧、所以名爲寶王者、如摩尼珠、普雨一切諸三昧寶。如轉輪王、普統一一切諸

三昧王。蓋是至頓圓之法門。始自華嚴。終至法華。一代時教。無不讚揚此寶王三昧。始自文殊普賢。乃至永明楚石。一切菩薩聖祖。無不修證宏通此寶王三昧。而世之昧者。猶以爲自性彌陀。非卽樂邦教主。唯心淨土。不在十萬億西。妄認六塵緣影爲自心相。全不知十方方法界。一一無非卽心自性也。可不哀哉。元末明初。鄞江有大善知識。厥名妙叶。深憫邪見。述爲念佛直指。二十二篇。世久失傳。雲棲老人。欲見之不可得。神廟年間。古吳萬融禪伯。偶於亂書中。得此遺帙。與唐飛錫法師所撰寶王論。同爲一編。皆雲棲老人所未見也。韓朝集先刻寶王論於雲栖。予續刻此板留佛日。今車罄蕃。更續刻於長干。特紀之以告後賢。

贈鄭完德念佛序

嘗讀十六觀經云。諸佛正徧知海。從心想生。是故衆生心想佛時。是心卽是三十二相。八十種好。是心作佛。是心是佛。噫。此真念佛三昧之秘要也。蓋但言作佛。不言是佛。則謂佛非固有。何異權乘。但言是佛。不言作佛。則謂佛非修證。何殊魔外。故大佛

頂經發明世出世法、知其本因、隨所緣出。夫知其本因、則十界無不卽心而是。謂佛界非心是乎。隨所緣出、則十界無不由心而作、謂佛非心作乎。予已已、晤千里鄭老居士、見所繪聖像、微細精妙、巧逾天工、恍悟心作心是之旨。長公完德、尤窮工極緻。完德久參念佛是誰公案、予謂苟信是心作佛、是心是佛二語、而更參誰字、可令人捧腹大笑。大集偈云、若人但念阿彌陀、是名無上深妙禪。至心想像見佛時、卽是不生不滅法。大勢至法王子云、憶佛念佛、現前當來、必定見佛。去佛不遠、不假方便、自得心開。永明禪師云、一念相應、一念佛、一日相應、一日佛。壽昌禪師云、念佛心、卽是佛。夫何疑哉、夫何疑哉。

### 刻校正大阿彌陀經後序

阿彌陀佛、以法界藏身、示居西方樂土。只此微塵樂土、含攝華藏無邊刹海、不可思議。所謂權實不二法門、徧入一切衆生心想、不墮一切衆生情計者也。十方諸佛、同共稱揚。寶積大會、叮嚀勸往。別本流行、凡經四譯。有宋王龍舒居士、未覩寶積善本、

輒會四譯棄短取長、名大阿彌陀經。舉世流通、千餘載矣。壽生菴萬融尊宿、得坊間舊本、較南北二藏、文理俱優、公諸孫刻之、此卽法藏願輪、古今一致者也。書經者、爲貞明王居士、予過吳門、爲正其句讀云。

合刻彌陀金剛二經序

非淨非穢、般若之體。知淨知穢、般若之照。取淨捨穢、般若之用。是故不以般若爲導、能生淨土者、未之有也。不以淨土爲歸、可稱般若者、未之聞也。或曰、彌陀部屬方等、金剛部屬般若。時教旣殊、旨歸豈一。余曰、甚矣見之固矣。如來一代教法、除聲聞藏、餘皆名大乘方等經典、般若安得非方等乎。從成道夜至泥洹夜、於其中間、常說般若、方等安得非般若乎。况淨土元門、理無不該、事無不攝。從華嚴寶積大集般若、乃至法華、無不導歸安養。只此安養、具足橫豎四種淨土。而四種淨土、並不離現前一念介爾之心。非橫非豎、亦橫亦豎。是故經云、莊嚴佛土者、卽非莊嚴、是名莊嚴。此唯心淨土之誠證也。末世執迷、不達心性本來無外。說唯心、便撥淨土。說淨土、便昧唯

心。安知西方極樂、廣徹華藏、華藏莊嚴、不出心性也哉。無我開士、合刻彌陀金剛二經、特序之。

法海觀瀾自序

摘錄

律教禪密四門、罔不以淨土爲歸、亦猶土之寄王四時也。淨土者、三德秘藏、常樂我淨、究竟安隱之處。所謂常卽法身、寂卽解脫、光卽般若。非一非三、而三而一。不縱不橫、不並不別、不可思議。不二而二、故全依卽正、名爲佛身。全正卽依、名爲淨土。祇此常寂光法性身土、全體迷之、而爲三界六道。偏證取之、而爲聲聞緣覺、權位菩薩。隨分悟之、而爲三賢十聖。所以諸佛爲實施權、不動法性、垂下三土、爲接三賢十聖。示實報淨土。爲接聲聞緣覺、權位菩薩。示方便淨土。爲接三界六道凡夫。示同居淨土。而諸衆生根性不同、樂欲亦異。或因持三聚戒、而淨四土。或因習教、解甚深義、而淨四土。或因禪觀、直悟自性、而淨四土。或因專修三密、傳持咒印、而淨四土。或唯一門、而淨四土。或二門三門四門、而淨四土。如世間草木華果、或生長熟脫於冬、或唯經

一時卽熟脫、或經二時三時、乃至具經四時、得熟脫、故云淨土如土王四時也。

### 彌陀要解自跋

經云、末世億億人修行、罕一得道、惟依念佛得度。嗚呼、今其時矣。捨此不可思議法門、其何能淑。旭初出家、亦負宗乘而藐教典、妄謂持名曲爲中下。後因大病、發意西歸。洞研妙宗、圓中二鈔、始知念佛三昧、無上寶王。方肯死心執持名號、萬牛莫挽也。吾友去病欲令此經大旨、辭不繁而炳著。予方願普與有情、同生極樂、不可辭。舉筆於丁亥九月二十有七日、脫稿於十月初五日。所願一句一字、咸作資糧。一見一聞、同階不退。信疑皆植道根、讚謗等歸解脫。仰維諸佛菩薩、攝受證盟、同學友人、隨喜加被。

### 十大礙行跋

#### 出寶王三昧念佛直指

佛祖聖賢、未有不以逆境爲大鑪鞴者。佛四聖諦、苦諦居初、又稱八苦爲八師。苟稍

存喜順惡逆之情、終與夏草同腐而已、安能如松柏之亭亭霜雪間哉。美玉不琢不成器、頑金不煅不至精。鐘不擊不鳴、刀不磨不利。豈有天生彌勒、自然釋迦、欲爲聖賢佛祖、必受惡罵如飲甘露、遇橫逆如獲至寶、方名素患難、行乎患難。方可於穢土、植淨土因。方如蓮出淤泥、超登不退。儻無事則駕言念佛、求生淨土。一遇不如意、輒悔慍咨嗟。吾恐三昧不成、生西未保。須於此十大礙行、一一自驗。果於病時、難時、乃至被抑時、唯增念佛心、明苦空觀、不尤不怨。庶蓮萼日滋、稱三昧寶王矣。

疏

### 化念阿彌陀佛同生淨土疏

自唯心本性之理不明、學者率尙元理、而薄事相。甚至認斷空爲寂光、疑西方爲非實、相與判作權乘、視同烏有。於是不可思議功德、終成難信之法。長溺迷津、可勝痛哉。不知事理一致、生佛同源、八萬四千相好光明、顯然在十萬億方、卽灼然居一真心內。心既豎窮橫徧、土亦豎窮橫徧。佛亦豎窮橫徧。既不信佛土之實、又豈知心性

非虛。若真悟心性本源，則了達十界染淨，咸由一心。心染故六趣昇沈，娑婆之惡境宛然。心淨故一道清甯，極樂之莊嚴法爾。奈何於娑婆則見其有，於極樂則惑其無。又高稱圓頓，侈談無礙，以忻厭是迂途，取捨爲兩橛。然果悟圓宗，忻厭何嘗不圓。果證無礙，取捨亦豈有礙。必欲離淨土而談唯心，捨彌陀而言本性，橫隔自他，割裂事理。如實料揀，僅成惡趣空見。豈若熾然存念，決定求生。了則念卽無念，生卽無生。不了亦無念之念，無生之生。以諸佛心內衆生，念衆生心內諸佛。不問智愚，咸歸覺海。一念相應，一念佛。念念相應，念念佛。佛是本覺，念是始覺。始本相合，當下究竟。能所歷然。能所性絕，至圓至頓。真實無礙，超越一切法門。名爲三昧中王。此六方調御，所以極力稱揚。歷代祖師，所以盡心修勸也。勝超大德，矢修淨業。欲使大千衆生，各各承當此事。爰立大冊，廣勸緇素。或自念，或轉請，或以口讚，或別冊襄。自念則念念合佛性，化人則人人頓會菩提。用心善且廣矣。特序之爲同有佛性者告。

淨然沙彌化念佛疏



經云、一稱南無佛、皆已成佛道。此言正因佛性、人人本具、故稱性所起緣了二因、必與正因同得究竟也。是以念佛三昧、名爲三昧中王、普攝一切三昧。修此三昧、凡有三種。一者惟念他佛、二者惟念自佛、三者自他俱念。修雖有三、成功則一。一念他佛者、托阿彌陀佛果德莊嚴、爲我所念之境、專心注意、而憶念之。或憶名號、或想相好、或緣四十八願、往昔洪音、或思力無畏等、現在勝德、或觀正報、或觀依報、總名爲念他佛。貴在歷歷分明、一心不亂、則三昧功成、徑登淨域。如東林諸上善人、卽其證也。二念自佛者、觀此現前一念介爾之心、無體無性、橫徧豎窮、離過絕非、不可思議。具足百界千如、種種性相、與三世佛平等無二。如此觀察、功深力到、圓伏五住、淨於六根、豁破無明、頓入秘藏。如西天四七、東土六祖、及南嶽大師、天台智者、卽其證也。三自他俱念者、了知心佛衆生、三無差別。衆生是諸佛心、內衆生、諸佛是衆生心、內諸佛。托彼果上、依正顯我自心理智。如觀經云、是心作佛、是心是佛。由我心性、本具功德、不可思議。諸佛果中威力、不可思議。故感應道交、自他不隔、極果圓因、稱理映發。

如永明壽楚石琦所修法門，卽其證也。方便多門，歸元無二，隨行一轍，俱得到家。切勿疑慮，自隔要津。今淨然沙彌，棲心淨土，兼以此法，廣化有緣。當知只此一念，便可作大勢至法王子眷屬，慎勿自輕自屈。更願見者聞者，深心隨喜，共登蓮籍，亦慎勿自藐藐他。庶幾同圓種智，而五濁可空也。勉之哉。

忍草沙彌化念佛疏

彌陀如來，以四十八願，攝化十方。勢至大士，以念佛三昧，游此世界。當知末世衆生，捨淨土一門，而求脫生死，不可得矣。佛法無多子，久常難得人。一時勇猛，不若終身無倦。所以慈雲大師，示晨朝十念法門。飛錫尊者，闡一念得生妙旨。今忍草沙彌，發心普勸緇素，修此念佛三昧。每日從十萬起，以至一百。或惟十聲，下至日念一聲。不拘數之多寡，但以終身不間斷爲則。將此飢餐渴飲工夫，用作寶地珍池左券。儻能一念中，頓破無明，便超寂光淨土。頓斷塵沙，便超實報淨土。頓斷見思，便超方便淨土。縱未斷惑，五濁漸澄，佛光漸露，登同居淨土。永脫輪迴，固無惑矣。普願見者聞者，

於此便作東林勝會想。於一切登名蓮簿者，便作十八高賢想。則一心普念三世佛，而念佛三昧，了了現前矣。

結社修淨業兼閱華嚴大鈔助緣疏

阿彌陀佛，以法界藏身，示成道於極樂。則有四十八願，廣攝羣機。毗盧遮那佛，亦以法界藏身，示成道於娑婆。則有普賢十大願王，導歸安養。是故欲求生淨土，須究華嚴宗。欲識華嚴宗，須求生淨土。或笑曰：華嚴事事無礙法界，當處即常寂光，何爲捨此求彼耶。應之曰：既事事無礙，即於此求彼，又何礙也。既當處即常寂光，即西方亦常寂光也。常寂光固無可捨，無可求，亦何礙捨，何礙求。如是捨寂光穢，求寂光淨。生則決定生，去則實不去。生則實不生，去則決定去。何礙之有。其人罔措。余曰：汝若不會，請問之毗盧遮那。汝若不能見毗盧遮那，請問之普賢願王。汝若不能見普賢願王，請向十字街頭。合掌語諸人曰：乞施我一文錢，當必有告汝者矣。

壽車牛碩人八秩序 摘錄

現前一念之心、亙古亙今、故名無量壽。靈明洞徹、故名無量光。阿彌陀佛、不過先得我心之所同然而已。是故吾人果能念念執持阿彌陀佛、卽是念念證無量壽、放無量光。古聖旣爾、今人亦然。至心旣爾、散心亦然。法華云、一稱南無佛、皆已成佛道。大聖金口、豈欺我哉。

銘

淨社銘

持戒爲本、淨土爲歸、觀心爲要、善友爲依。

贊

阿彌陀佛像贊

一指光周法界、十念成皆自在。感應道交、生佛無礙。討甚自性彌陀、只此豈屬心外。極樂大聖、法界醫王。入慈悲定、放智慧光。盡未來際、恆照十方。衆生念者、攝取不忘。以如幻力、應物現色。妄想稠林、相好百億。卽影卽真、不貳不忒。嗟彼生盲、覲面弗識。

別覓元機。翻墮見惑。我今稽首。滿月萬德。願共含靈。歸安養國。

稽首宏願四十八。一一願光不可盡。果徹因源恆度生。蓮華國土如明鏡。觀影聞名創發心。頓入寶王三昧印。但勤瞻禮莫辭勞。紙墨元同法界性。緣生當體空假中。四德三身不別並。况復澄空月正圓。心水澄清月自映。

諸佛正徧知海。不離衆生心想。是故眼見耳聞。盡是彌陀聲像。癡人捨此別求。喚作法身向上。誰知棄有覓空。一體無端成兩。若知兩既不存。畢竟一何須尙。熾然禮拜稱名。卽是超方伎倆。

稽首西方須摩提。無量清淨平等覺。乘於六八大願輪。示現八萬四千相。相有八萬四千好。好有八萬四千光。一一光中照法界。普攝念佛諸有情。猶如慈母念一子。是故入此三昧王。名爲普現一切相。畫師承此三昧力。紙筆爲緣妙相生。此相卽是因緣生。生卽無生。生具三諦。三諦三身既宛然。四德應知無缺減。所禮旣卽諦與德。能禮應知卽止觀。諦觀名別體復同。是故能所性空寂。稽首如空無所依。是卽自性無量。

覺。

沈母金太孺人往生讚

有序

吾人現前一念心性、原與阿彌陀佛同體。而罕能直下知歸者、無他、未具信願行三故也。予嘗謂信如將、願如謀、行如軍旅。有將有謀、老弱亦可取勝。苟無將謀、雖勇壯亦潰矣。是故信宜專、願宜審、行宜無所不收。專且審、故圓頓直捷而至高。無所不收、故三根普被而至廣。此念佛三昧、所以爲橫超勝異也。邇來宗教之士、或視念佛太易、以爲曲被中下。或視念佛太難、以爲齋戒須全。夫太易則不高、太難則不廣、豈寶王三昧之謂哉。今觀太君坐逝、洵可頓釋兩疑。合掌贊曰。

人心佛心、本自無二。一念相應、欲仁仁至。卓哉沈母、信此實義。聖號喃喃、日時不離。但持十齋、慈祥愷悌。罕覩怒容、多瞻惠施。八十六年、淨業乃粹。集飲歡娛、大醒如醉。慕直西歸、坐脫若戲。欲顯真因、身香表瑞。信矣高圓、誠然廣被。匪易匪難、千秋永企。

自像贊

信得自心是佛，乃信是心作佛。所以枯坐喃喃，端念阿彌陀佛。偏要記串記千，不學顛預鶻突。無論專心散心，聲聲滅罪八十億劫。假使衆生界盡，虛空界盡，我此持名終無休歇。

博山禪師拈淨土偈。每云淨心卽是西方土，蓋以因攝果也。讀者不達，遂致以理奪事，幾成破法。予觸耳感懷，每拈西方卽是唯心土，俾以事扶理，聊附補偏救弊之職云。

### 詩偈

#### 淨土偈十四首

有序

西方卽是唯心土，無上深禪不用參。佛向念中全體露，更生疑慮太癡憨。  
西方卽是唯心土，離土譚心實倒顛。念念總皆歸佛海，生盲重覓祖師禪。  
西方卽是唯心土，得見彌陀始悟心。寸土不存非斷滅，堂堂相好寂光身。  
西方卽是唯心土，欲悟唯心但念西。舌相廣長專爲此，更求元妙抑何癡。

西方卽是唯心土、無相非從相外求、擬欲將心取無相、靈龜曳尾轉堪憂。  
西方卽是唯心土、未識西方豈識心、逝子謬希圓頓解、拾將落葉作黃金。  
西方卽是唯心土、更覓唯心見已違、光影揣摩成活計、蓮邦何日薄言歸。  
西方卽是唯心土、擬撥西方理便乖、極樂一塵同刹海、假饒天眼未知涯。  
西方卽是唯心土、趁到同居第一關、但得九蓮能托質、寂光何慮不時還。  
西方卽是唯心土、土淨方知心體空、一切境風猶掛念、云何妄說任西東。  
西方卽是唯心土、莫把唯心旨趣誣、迷悟去來元藏性、謾言平等卻成迂。  
西方卽是唯心土、白藕池開不用栽、一念頓教歸佛海、何勞少室與天台。  
西方卽是唯心土、三昧中王道最微、瞥爾生疑千古隔、咬釘嚼鐵莫依違。  
西方卽是唯心土、慧日高懸第一機、事理雙融真淨業、現前何法不元微。

贈參已

盡大地是箇自己、彌陀亦在裏許安身。盡法界不出彌陀一毛孔光明、自己更向何



處着脚。念念彌陀念念已。自他不隔是真參。若從少室求端的。鈍置已靈真可憐。故  
今參已無別事。六時長憶紫金仙。

### 答初平發願偈

有願無行。如人無足。有行無願。如盲無導。信步前行。嶮惡難保。丁茲末季。法弱魔強。  
縱有乾慧。猶難穩足。况雖立志。慧眼未開。今生不度。更待何生。阿彌陀佛。大願深慈。  
如母憶子。子何弗思。若不至心。早暮迴向。悠悠緩緩。卽逃逝人。非必訶謗。乃名逃逝。  
汝今已能。奮然自新。當知珍池。斯萌蓮蕊。從今數發。相續不斷。斯可名爲。勇猛丈夫。  
如或未然。仍前習氣。始勤終惰。口向心背。旣非菩薩。亦非二乘。常在三界。出沒輪迴。  
自未能度。云何度人。如被漂者。欲拯岸行。如癩病者。賣瘡癬藥。愚癡顛倒。舉世所嗤。  
汝旣發心。我深隨喜。復爲勸助。使得堅忍。同覲慈尊。共化塵刹。盡未來際。永矢弗諼。  
願汝精勤。先成佛道。我作文殊。助汝揚化。

### 贈頂瞿師掩關念佛

阿彌陀佛聲歷歷，自他共離不可覓。是心作佛是心是，熾然感應真空寂。驀直歸來莫問津，無明睡裏轟霹靂。醒來捫枕笑呵呵，夢墮大河誰實溺。夢時非墮醒非超，一任凱風同奏續。髻珠解處紹功成，內外空爭庶與嫡。無生曲裏明月寒，白牛背上橫吹笛。

贈莊聖西

彌陀卽是毗盧師，極樂卽是華藏界。八萬四千相好中，一一具足刹塵相。西方一一微塵中，具足世界差別種。是故普賢大願王，究竟導歸安養土。同居淨故四俱淨，橫超自在甚希有。若人深信淨土門，始是深信法界理。若人已悟法界理，方肯熾然求往生。法界非往非不往，順悉檀故名爲往。法界非生非不生，順悉檀故名爲生。如是往生卽向上，圓頓了義無倫匹。

示馬光世

未知箇事難得知，已知欲忘亦不易。忘却威音那畔底，今時方顯頭頭是。著衣喫飯

弄神通、劍樹刀山任遊戲。念彌陀、算珠記、夫婦知能第一義。淨穢兩忘仍歷然、法界分明無礙事。一念圓彰四土嚴、三身頓證驚長寐。信得真、見得至、步步脚跟都著地。以茲自覺覺衆生、大智光明照十世。

### 示豁一

華嚴圓頓經王、普賢法界宗主。十願導歸極樂、便是元極微旨。若更別叩祖關、都是奴僕婢使。果然奇特丈夫、卓信心作心是。念念相應不差、豈肯水中渴死。瞬息旋轉萬流、一句彌陀到底。

### 大病初起求生淨土

閻浮百苦鎮煎熬、賴有摩提路匪遙。六字洪名眞法界、一聲凡念海全潮。濁流寸寸清珠映、暗室層層寶炬照。千古東林風未墜、不須方便自橫超。

沈疴危篤是吾師、消卻從前多少癡。已破百年閒活計、定開塵劫大通達。遙瞻落日增哀慕、夢禮慈容長智悲。六八願王恆攝取、金蓮育質可無疑。

持名真實是單傳，念念圓成深妙禪。能所本來無二體，果因交徹卽重元。廣長舌相堅真信，周徧身光結法緣。大事分明唯此事，同仁共策祖生鞭。

病經累月皮纏骨，彷彿冥途薜荔多。髀弱羨人甘六味，根羸塵我順三和。軒岐伎倆非雙善，忉利酥醪奈異疴。最是樂邦慈父願，含生永永離沈疴。

久向阿彌誓力深，浮生無奈染相侵。聞聲見色都忘念，計後思前轉昧心。痛極色聲緣自斷，病危前後影方沈。孤明六字全提出，百獸羣中師子音。

乾慧初乾業未枯，病深無計可支吾。稱名不異兒號乳，懺罪何殊囚伏辜。乍慶此時方得主，更慚歷劫枉成逋。叮嚀法侶勤相助，共解輪王髻裏珠。

佛頂文句大勢至章

附

大勢至法王子、與其同倫五十二菩薩。卽從座起、頂禮佛足、而白佛言。我憶往昔恆河沙劫、有佛出世、名無量光。十二如來、相繼一劫。其最後佛、名超日月光、彼佛教我念佛三昧。譬如有人、一專爲憶、一人專忘。如是二人、若逢不逢、或見非見、二人相憶、二憶念深。如是乃至從生至生、同於形影、不相乖異。十方如來、憐念衆生、如母憶子。若子逃逝、雖憶何爲。子若憶母、如母憶時、母子歷生、不相違遠。若衆生心、憶佛念佛、現前當來、必定見佛。去佛不遠、不假方便、自得心開。如染香人、身有香氣。此則名曰、香光莊嚴。我本因地、以念佛心、入無生忍。今於此界、攝念佛人、歸於淨土。佛問圓通、我無選擇、都攝六根、淨念相繼、得三摩地、斯爲第一。

念佛三昧、亦逗此方機宜。末世衆生、須依念佛得度。又四種三昧、同名念佛。念佛三昧、名爲三昧中王、能攝一切三昧故也。十六觀經云、但見此菩薩光、卽見十方無量諸佛淨妙光明、是故號此菩薩、名無邊光。以智慧光、普照一切、令離三途、得

無上力。是故號此菩薩。名大勢至。釋此圓通。亦爲三意。一明境通別者。別則隨舉一根。皆得爲所觀境。如那律等五人以下。及下文觀音大士也。今云都攝六根。其境則通。依此六根。而修念佛三昧。復有三種不同。一者唯念自佛。二者唯念他佛。三者自他俱念。若惟念自佛。則與二十四種圓通自同。唯須一重能所。所謂以六根爲所觀。以妙觀察智相應心品。爲能觀。如央掘經云。所謂彼眼根。於諸如來常。具足無減修。了了分明見。乃至彼意根。於諸如來常。具足無減修。了了分明知等。此則該攝一切諸教。一切禪宗直指法門。罄無不盡也。若惟念他佛。則與二十四種圓通有別。須知兩重能所。所謂妙觀察智爲能觀。六根爲所觀。六根爲能念。諸佛果德爲所念。由第六識。夾持六根。專注佛境。俾眼所見。無非佛色。耳所聞。無非佛聲。鼻所嗅。無非佛香。舌所宣。無非佛號。身所對。無非佛境。意所緣。無非佛法。此則該攝彌陀藥師上生等經。及蓮社事想法門。罄無不盡也。若自他俱念。則與二十四聖圓通。同而復別。先須開圓頓解。了知心佛衆生。三無差別。自他本是不二。

乃託他佛、以顯本性故。托外義成、唯心觀立。此則開圓解處、與諸聖異。十六觀經、所謂勝異方便、今文所謂不假方便、自得心開、由其方便、最爲勝異、故更不假餘方便也。二明觀盈縮者、念佛三昧、亦有四教不同。一一教中、亦復各有念自、念他、自他俱念、三種差別。藏教三者、觀此六根、無我我所、證自滅諦涅槃、名念自佛。以此六根、緣佛三十二相、八十種好、滅罪生福、成出世因、名念他佛。緣想佛境、攝我六根、爲欲淨諸戒品、生定發慧、現證果故、名自他俱念也。通教三者、觀此六根、當體卽空、非滅故空、名念自佛。六根如幻、佛身亦然。以如幻根、緣如幻佛、滅如幻罪、生如幻福、乃至得證如幻涅槃、名念他佛。所念能念、無二幻故。托如幻境、成如幻觀、名自他俱念也。別教三者、觀此六根、依無明有、斷無明故。九界六根得滅、佛界六根得成、名念自佛。正因佛性、雖復理同、我無緣了、諸佛已具。緣念諸佛果中勝德、不生疲厭、名念他佛。我與諸佛、三因平等。諸佛圓證、我今在迷。先念化身佛、助我緣因。次念報身佛、助我了因。後念法身佛、顯我正因。名自他俱念也。圓教三者、

六根皆如來藏。如來藏中、性見覺明、覺精明見、如一見根、見周法界。聞、嗅、覺、知、亦復如是。妙德瑩然、周徧法界、是念自佛。觀一佛身、卽是一切諸佛之身。觀一相好、卽是一切相好之海。稱一佛名、卽是一切諸佛之名。觀一法門、卽是一切微妙法門。觀於佛土、一塵一法、卽是一切諸塵諸法。見一色身、卽是圓見法報化身。瞻一影像、卽是如來三身實相。名念他佛、諸佛乃衆生心內之佛。衆生乃諸佛心內衆生。觀身實相、觀佛亦然。全由性具三德、成彼諸佛果上三身。觀彼諸佛果上三身、卽發自心本有三智、名自他俱念也。三明證本迹者、自行則本迹俱圓、化他則四教俱用。還須先約三種念佛、以釋今文。次明四種淨土、以彰能攝。約念他佛、釋今文者、一專爲憶、卽指十方如來。一人專忘、卽指迷倒衆生。佛常逢見衆生、衆生常不逢見諸佛。故云、若逢不逢、或見非見。次喻佛憶衆生、更與尋常憶念不同。直如慈母憶子。子今憶母、亦須如母憶子、方得歷生、不相違遠。憶者、恆審思量。念者、注心一境。憶念若深、則有現前卽見佛者、如遠公三見聖相之類是也。亦有當來乃



見佛者、如臨終佛迎、乃至華開見佛之類、是也。不惟得見果佛、亦去果佛不遠。如經所明、不退菩提、多有一生補處、是也。不假方便、謂卽以念佛爲第一勝異方便、非餘一切方便所可及也。香喻諸佛果德、染香人身有香氣等、喻攬果成因、因能克果也。約念自佛釋今文者、一專爲憶、以喻本覺之性、隨諸衆生、流轉五道、不相暫離。一人專忘、以喻始覺在無明時、念念背覺合塵。始本不離、故若逢。始本不合、故不逢。本卽在始、故或見。始恆迷本、故非見也。十方如來、卽指衆生本覺之性、元自豎窮橫徧、能生始覺、喻之如母。始覺在無明時、全體從本覺起、而違背本覺、喻以如子逃逝也。現前見佛、是圓初住、親見本覺法身。當來見佛、是圓五品六根相似、見於本覺。去佛不遠、謂去自心妙覺極果不遠。不假方便、謂不假諸餘方便、非謂念自心佛、不是勝妙方便也。香喻本覺理性、染香人身有香氣、喻無明熏變成始覺也。約自他俱念、例此可知。次明四種淨土、以彰能攝者、所謂凡聖同居淨土、方便有餘淨土、實報無障礙淨土、寂光淨土也。今以藏通二教、念他佛念自他佛

二種三昧、攝歸同居方便二種淨土。謂藏七賢、通、乾慧性地、皆歸同居淨。藏、四果、通、見地已上、皆歸方便淨也。以別教二種念佛三昧、攝歸同居方便實報三種淨土。十信位、歸同居淨。十住十行十迴向位、歸方便淨。十地證道同圓、由念他佛之力、歸實報淨也。以圓教二種念佛三昧、攝歸四種淨土。五品位、歸同居淨。十信位、歸方便淨。初住去、歸實報淨、亦復分證寂光妙覺位、歸於究竟寂光淨也。若夫單念自佛、則通教已辦地上、能歸方便淨土。乾慧性地、不能歸同居淨土。藏教一總不能。圓教能歸實報寂光二種淨土。別教不能。又圓教、但念自佛者、但能豎入上三淨土、不能橫超西方淨土。又單念自佛、則是諸聖所同、不顯此門獨妙。又單被四教利根、不能普被四教三根、故非勢至化他之本旨也。問曰、但念他佛、得非心外取境耶。答曰、圓人熾然、但念他佛、了知他佛不離自心。權乘縱未了達自心、究竟心外、決無別佛。故此念佛三昧、若迷若悟、皆可共遵。迷者遵之、則不假方便、自得心開。悟者遵之、則自他不二、始覺合本矣。名爲三昧中王、不亦宜乎。

## 選佛譜說附

### 淨土橫超門

譜曰、佛土有四、一者凡聖同居土。若是五濁重者、所感則雜、有四惡趣苦、名之爲穢、如娑婆世界等。若復五濁輕者、所感則純、是人天善侶、名之爲淨、如西方極樂等。二者方便有餘土。若從析空拙度得生、則沈空滯寂、名之爲穢。若從體空巧度得生、則見佛聞法、名之爲淨。三者實報莊嚴土。若從次第三觀所感、則雖證道同圓、而無明習重、智慧稍鈍、名之爲穢。若從一心三觀所感、則雖法界無別、而無明習輕、智慧猛利、名之爲淨。四者常寂光土。若約別教、則僅斷十二品無明所顯、未盡法源、名之爲穢。若約圓教、則是斷盡四十二品無明所顯、究盡體性、名之爲淨。然此四土有豎有橫、若以自修行力、斷盡見思、方出同居而方便。斷盡塵沙、兼破無明、方出同居方便、而入實報。斷盡無明、方出同居方便實報、而入寂光、卽名爲豎。若仗阿彌陀佛願力、未斷見思、卽能出娑婆穢、生極樂淨。旣生極樂、卽於彼土、得證方便實報、寂光三

種淨土。不必捨身受身，然後證入，故名爲橫也。約四教分別者，藏教析空觀成，出同居穢，入方便穢，不能生同居淨，况生方便淨耶。通教體空觀成，出同居穢，入方便淨，然不能於未斷惑前，生同居淨。別教知有他方佛國，十信位中，若能發願往生，卽生同居淨土。若不發願，仍不得生。十住、行、向，能生方便淨土。十地等覺，僅能生實報穢。教道妙覺，僅能證寂光穢。圓教五品觀位，若能發願，任運感同居淨土中三品生。若不發願，則未必生。圓十信位，若能發願，任運感同居士上三品生。即便橫證方便淨土。既悟無生，亦卽橫證實報寂光二種淨土。若不發願，須至七信，方任運生方便淨土。惟初住以上，無論發願與否，任運分證實報寂光兩種淨耳。是故設依自修行力，則四教並名豎入。惟依阿彌陀佛願力，始可橫超也。問：十惡猛心，人天小善，苟能懺悔，迴向發願，卽得往生極樂世界。何謂藏通二教，不生西方。答：藏通二教，不聞他方佛名字故。若得聞我阿彌陀佛，萬德洪名，懺悔迴向，發願往生，卽屬別圓二教所攝。機故問，圓教法

門、不縱不橫、何得亦名豎入。答、不縱不橫、乃約所詮理諦、并稱理所修妙觀言耳。至如六卽辨位、分毫不濫、豈非豎義、故惟淨土、方得名橫超也。問、藏通二教、旣不得生、何故彼土、仍有證小果者。答、往生論中、曾辨此義、謂由臨終、迴心發大乘願、方得生彼。旣生彼已、阿彌陀佛、順其小習、爲說苦空無常無我等法、令其卽證小果、旋卽迴心入大乘法。不同此土、定性聲聞。故曰、二乘種不生也。思之。

### 淨土疑城

大寶積經、無量壽如來會云。佛告彌勒、若有墮於疑悔、種諸善根。希求佛智、普徧智、不思議智、無等智、威德智、廣大智。於自善根、不能生信、由聞佛名、起信心故。雖生彼國、於蓮華中、不得出現。於五百歲、不見佛、不聞法、不見菩薩、及聲聞衆。不得供養奉事諸佛、不得問於菩薩法藏、遠離一切殊勝善根。往昔世中、過失盡已、然後乃出。當知疑悔、爲大損害。文由此觀之、卽是信他、而不信自。未開圓解、但持佛名、以種善根之所致也。然亦永離退緣、遠勝非非想處多矣。

下品下生

准十六觀經、十二大劫、蓮華方開。蓮華開已、聞法歡喜。卽發菩提之心、是登發心住也。

下品中生

經於六劫、蓮華乃敷。聞說大乘甚深經典、應時卽發無上道心、亦是登發心住也。

下品上生

經七七日、蓮華乃敷。聞說甚深十二部經、信解發心、爲初發心住。經十小劫、具百法明門、得入初地、卽登歡喜地也。

中品下生

經七日已、聞法歡喜、得須陀洹。過一小劫、成阿羅漢、登已辦地。淨土無定性聲聞、應以見地爲初果也。

中品中生

七日華敷、聞法歡喜、得須陀洹、是登見地。經半劫已、成阿羅漢、亦登已辦地矣。

### 中品上生

臨命終時、見佛作禮、未舉頭頃、即得往生。蓮華尋開、聞歎四諦、即得阿羅漢道、亦登已辦地。從此增進、便得橫超實報淨也。

### 上品下生

一日一夜、蓮華乃開。七日之中、乃得見佛。於衆相好、心不明了、三七日後、乃了了見。經三小劫、得百法明門、住歡喜地。從此增進、亦可例知。

### 上品中生

此紫金臺、如大寶華、經宿則開。經於七日、即於無上菩提、得不退轉、即證圓信。經一小劫、得無生忍、現前受記、是圓住也。

### 上品上生

如彈指頃、往生彼國、見佛聞法、悟無生忍。於諸佛前、次第受記、即證圓十住也。或

從此卽證寂光。上上品者，至圓至頓，不思議故。同居淨土位竟。

### 方便有餘淨土

方便有餘淨土，乃是修方便道三乘所居。故大智度論云，出三界外有淨土，一切聲聞緣覺，出生其中，受法性身，非分段生。文若統論生方便土，共有九人。一者藏教第四果，二者藏教辟支果。是人雖生滅度之想，自謂永入無餘涅槃，不知已受生死變易之生。但以沈空滯寂，如醉如癡，直俟三昧酒消，然後從禪定覺，是名方便穢土也。此智論用對同居，故亦名淨土。此就方便分別，自有淨穢。三者通教已辦聲聞，四者通教辟支佛地，五者通教七地菩薩，智增上者。若悲增上，則誓扶習氣。受三界身，不出三界故。六者別教，七住以上菩薩。七者十行菩薩，八者十迴向菩薩，九者圓教七信以上菩薩。三界惑盡，若非大悲增上誓力，必皆生在方便淨土之中。就此七人，分爲九品。故幽溪選佛圖中，乃與實報寂光，皆詳列之。今謂淨土及圓教，並是頓超直入法門。故惟同居淨土，依憑十六觀經，而列九品。上三淨土，皆但總列一名而已。况同居上品，已屬圓信所生，卽與方便淨



土無別耶。

實報莊嚴淨土

實報淨土、約修德所感、稱實果報言之。謂色心無礙、身土難思、毛孔徧含刹海、十世不離剎那。此亦可分九品、初發心住爲下下品、乃至究竟妙覺爲上上品、表其至圓頓故。

常寂光淨土

寂光淨土、約修德所顯、真實法性言之。謂如智不二、依正圓融、真俗兩忘、自他不二、塵塵罔非法界、念念貫徹古今。常卽法身、寂卽解脫、光卽般若。三德秘藏、不縱不橫、具足常樂我淨、迴超四句百非。然亦可分九品、初發心住所證、爲下下品。乃至究竟妙覺所證、爲上上品、表其至頓至圓故。

秘藏指南卷下終

秘藏指南 卷下

## 秘藏指南跋

有明四大尊宿、雲棲靈峯、並宏揚淨宗。雲棲已有彙語之刻、靈峯則除要解外、未有專書。頃閱宗論、見堅密大師輯論畢、跋云、讚淨土者、別爲秘藏指南之書。倘能盡善盡美、則有大利而無有害。未遑別刻、附記于此云云。不啻先得我心、因從宗論中、摘出此冊、並附以佛頂文句、選佛譜說、卽名曰秘藏指南、成堅師之志也。淨宗之旨、雲棲從禪宗入、是由頓通圓。而靈峯則由教觀入、乃以圓攝頓。秘藏圓旨也、誠不易指南。靈峯之論、顯而直、妙而超。約其要旨、不外乎觀經所云、是心作佛、是心是佛、兩言而已。是心作佛者、顯佛從修、非徒理卽、全是而作、全性起修也。心若不作、則成天生彌勒、自然釋迦矣。是心是佛者、顯佛本具、非徒修得、全是心、全修在性也。心若不是、則非唯心淨土、自性彌陀矣。宗論每勸學人、必令先開圓解、稱性起修、此卽自他俱念之旨。後之學者、苟能于此書中、隨拈一文一句、徹底薦取、則秘密藏一時打開、百界千如、無非南也。卽無非西方極樂世界也。因該果徹、庶不負指點婆心矣。

道光丁未夏季淨業學人趙鉞和南謹跋

後跋

夫淨土之法、直接上根大器、傍引中下之機。上根之人、一聞彌陀名號、卽悟無上菩提。中下之人、至心稱念佛名、亦生極樂淨土。既生淨土、永離退緣、此所謂但得見彌陀、何愁不開悟是也。豈非至圓至頓、至簡至易之大法門也。

靈峯大師、以微妙三觀、闡念佛法門。廣大精微、幽深玄遠。而復簡要直捷、妙應時機。令人生正信、發大願、修妙行、而入秘藏也。實末法之津梁、昏衢之寶炬。予一見之、得未曾有。爰偕善信、捐資重梓、板成之日、誌其緣起云耳。

同治八年仲冬月

吉旦

淨業弟子妙然敬跋



